


ELEMBO

 . . . botangi ya Liloba. Mpo na bosukisi liyangani, ntina nasengaki bino bótelema . . . Ntango bayembaka *The Star-Spangled Banner*, botelemaka. Boye te? [Losambo balobi: “Iyo.”—Mok.] Na bongo, mpo na nini te mpo na Liloba na Nzambe? Ezali limemia. Sikawa na Mokanda ya Esode, mokapo ya 12, kobanda na molongo ya 12, Nakosepela kotanga eteni ya Likomi, molongo ya 12 mpe ya 13.

Mpo ete ngai nakoleka kati na mokili na Ejipito na butu yango, mpe nakobeta . . . bana na nkulutu na mokili na—na Ejipito, moto mpe nyama; mpe . . . nakopesa etumbu: Ngai nazali NKOLO.

Makila ekozala elembo mpo na bino na ndako epai wapi ezali bino; mpe ekomona ngai makila, Nakoleka likolo na bino, mpe malali ekokitela bino te, wana ekobeta ngai mokili na Ejipito.

2 Motó ya Liteya na ngai ezali: *Elembo*.

3 Tógumba mitó sikawa. Mpe kati na kimia na Ye ya ntango oyo ya bulee, oyo liboso ete tóbelema na Ye kati na libondeli, ezali na bosenga moko oyo bokolinga ete Nzambe áyanola na yango sima ya nzanga oyo? Tombola bebele maboko soki olingi, mpe kanisa na nse na motema na yo eloko oyo olingi ete Ye ásala. Bipai nyonso na kati ya ndako oyo, bókanisa kaka oyo bolingi ete Ye ásala.

4 Tata na biso na Likoló, Yo ozali Nzambe oyo abongwanaka te, mpe tobondeli ete Óyanola mabondeli na biso, sima ya nzanga oyo, wana—wana totómboli maboko na biso. Mpe Omoni ete maboko na ngai ezali mpe likoló. Mpe bosenga na ngai, nakotalisa yango polele, ezali ete, Nkolo, Óbikisa moto nyonso na kati awa lelo, bikisa moto nyonso oyo abungi. Sikawa, Olobaki: “Soki bosengi Tata eloko nyonso, na Nkombo na Ngai, Nakosala yango.” Sikoyo, Nkolo, sunga biso elongo tóndima lokola lisanga ya bato, ya bana oyo bazondima. Solola na nzela ya Liloba na Yo, Nkolo. Liloba na Yo ezali Solo. Pambola mitema na biso.

5 Totondi Yo mpo na liyangani oyo. Totondi Yo mpo na Ndeko Grant, mpo na basali na ye nyonso, mpe mangomba ná bato nyonso. Mpe mpo na nyonso oyo Osili kosala mpo na biso, Nkolo, tozongisi matondi epai na Yo. Tata, ekoki kozala na ebele kati na biso awa bakotikalá komonana lisusu bamoko na bamosusu te, kino tokomonana na ngambo mosusu. Oyo ekoki kozala liyangani ya suka oyo tokofanda elongo na mokili oyo. Tika ete Molimo Mosanto áya mpe ápambola biso elongo, ápesa biso bosenga na biso. Na Nkombo na Yesu tobondeli. Amen.

Bokoki kofanda.

⁶ Nazali na mwa etanda ya ekomeli awa, nakomi mwa Makomi mpe makambo mike mike. Kala nazalaki kokoka komikanisela yango na makanisi na ngai, kasi nasili kolekisa mibu ntuku mibale na mitano, boyebi, ezali nde, mbala ya mibale. Na bongo nazoyeba lisusu te ndenge namesanáká, mpe mikumba ebele kati na mayangani mpe nyonso wana, ná makambo ebele ya kosala.

⁷ Liteya na biso sima ya nzanga oyo ezali: *Elembo*. Likambo na biso ebandii na Ezipito. Ezali elilingi moko monene awa sikawa, nalingi ete bino nyonso bómona yango mpe nalingi ete bózála mpenza na limemia ndenge bokokoka. Ezipito ezali esika ya likambo yango, mpe ngonga ya likambo yango ezali kaka na ebandeli ya esode.

⁸ Mpe, sikawa, ezali elilingi ya lelo, etalisami, wana tozali mpe liboso na esode mosusu. Nzambe azali kobimisa Yisraele libanda na Ezipito, kokende na mboka na elaka, ezalaki elilingi ya Klisto kobimisáká Mwasi na Libala libanda na lingomba, kokende na Mboka na elaka. Tozali kati na esode mosusu. Sikoyo soki bokoyekola Likomi, tozali na ntango kaka ya kosimba oyo ya likolo-likolo na yango, ezali solo. Bisó tozali. . . Ndenge Nzambe abimisaki ekólo moko longwá na ekólo moko, Nzambe akobimisa Mwasi na Libala longwa na lingómbá. Mwasi na Libala akobiangama longwa na mangomba nyonso. Ekozala baponami ya Nzambe, bakobimisama. Mpe tobelemi na esode yango sikawa, mpamba te tozali na elembeteli nyonso ya Likomi ete tokomi wana. Sikawa, nayebi ete elobamá mbala na mbala, kasi, moninga na ngai, ntango moko ekolobama mpo na mbala ya suka. Ntango ekoyingela bongo kati na Seko-na-seko. Azali koya kobimisa Mwasi na Libala longwa na lingomba.

⁹ Elembo ezalaki eloko oyo esalaki bokeseni kati na Ezipito mpe Yisraele, bikólo mibale yango. Bango nyonso bazalaki bato, kasi bango nyonso bakelami na Nzambe, bango nyonso mosala ya loboko na Nzambe, kasi, bokeseni ntango etumbu ya liwa elekaki, bokeseni kati na bomoi mpe kufa ezalaki elembo.

¹⁰ Ekozala mpe bongo na boyei ya Mwana na Nzambe, ntango Akobimisa Mwasi na libala kati na lingomba, bokeseni ekozala Elembo. Sikawa, bóyoka na bokebi sima ya nzanga oyo, mpe bó тала soki ezali solo te. Elembo nde ekosala bokeseni. Esengeli kozala na bokeseni moko.

¹¹ Nzambe akosambisa mokili, mokolo moko. Soki natuni bato na Katoliko: “Nani Ye akosambisa, Akosambisa mokili na nini?” Bango bakoloba: “Lingomba.” Lingomba nini? “Lingomba Katoliko.” Lingomba Katoliko oyo wapi? Ezali na ebele na bango. Ba-Methodiste bakoloba: “Na nzela ya ba-Methodiste,” ba-Batiste na ntango wana bazwami libanda na likambo yango. Na bongo, soki osambisi yango na nzela ya lingomba ya Batiste, baoyo nyonso batikali bazali libanda. Ba-Pentecotiste

bakoloba: “Na nzela ya Pentecote,” boye baoyo nyonso batikali bazali libanda. Bomoni, ekozala na mobulu, mobulu mingi mpenza, mobulungano mpenza na makanisi, kokanisa eloko ya ndenge wana.

¹² Kasi Nzambe azalaki na lolenge moko awa oyo Alobaki ete Akosambisa mokili, na nzela na lingomba Katoliko te, na nzela na lingomba Protestant te. Kasi Akosambisa mokili na nzela na Yesu Klisto, mpe Yesu azali Liloba, boye yango wana ezongi lisusu na Biblia. Bomoni? Akosambisa mokili na nzela ya Biblia. Mpe Biblia ezali Buku na Nzambe ya kosambisa, yango nde emoniseli mobimba ya Yesu Klisto, ete eloko mosusu moko te ekoki kobakisama to eloko moko kolongolama na Yango; etumbu ya kosala yango, ezali nkombo na yo kolongolama na Buku ya Bomoi. Bótíkala kaka kati na Buku yango, mpe bóbondela Nzambe ete ákomisa biso eteni na Yango.

¹³ Sikawa, tomoni ete elembo, elembo ezali nini? Elembo ezali etaliseli ya motuya efutami, elembo ezali yango. Kaka lokola bingbunduka mpe ya bisi na biso, tozwaka mbongo na biso mpe tokendeke na esika etelemaka. Sikawa, bomoni, bisi epesami ndingisa te, na bisika oyo bazali kosalelaka bilembo, epesamelá bango ndingisa te ya kozwa mosolo. Bakoki kozwa mosolo te, esengaka elembo; ndakisa mpépo, ézala eloko mosusu nini. Okeyi na esika moko boye, esika basombaka, mpe okosomba, na mbongo na yo, bilembo ebele, elembo oyo moko boye. Mpe elembo oyo ezali etaliseli ete motuya esili kofutama. Ozali na makoki ya kokóta na masuwa, kokóta na mpépo, kokóta na bisi, to eloko nyonso oyo yango ezali, na ntango nyonso osimbi elembo kolakisa ete—ete mobembo na yo esilaki kofutama. Sikawa bómikanisela yango. Bóbosana yango te.

¹⁴ Mwana na mpate oyo abomami ya Yisraele ezalaki na . . . ezalaki eséngisi ya Nzambe. Yawe asengaki mwana na mpate oyo ebomami, oyo eyebi mabe te ézwa esika ya mosusu. Lokola tomonaki yango kati na mposo oyo eleki sikawa, ete Nzambe, ntango Akamataka mokano, Atikalaka kobongola yango te. Mpe Afungolaki nzela, eloko na Ye ya liboso oyo Asalaki ntango moto akweyaki, Asengelaki kobongisa nzela mpo na ye kozonga, soki Alingaki mpenza kosikola ye, mpe Azuaki mokano ete Abikisaki moto na nzela na Makila ya Oyo asali mabe te. Mpe Asalá likambo yango ndenge moko mpo na libela. Atikálá kobongola yango te. Esika moko te Nzambe akotikálá kokutana na mosambeli nyonso, bobele na nsé na Makila. Wana nde esika bobele moko ya Ye.

¹⁵ Tomekaka kosala ete Ye ákutana na nsé ya theologie na biso, na nsé ya denomination na biso, na nsé ya manáka ya koyekola na biso. Bamoko batongi ba-ndako-milai mpe basusu batongi bingumba, Babilone mpe—mpe ndako molai ya Babele, mpe biloko ndenge na ndenge. Kasi etikali kaka bongo, Nzambe akutanaka na mosambeli ya solosolo na nsé ya Makila.

Abongolaka yango ata moke te. Bisu nyonso tokoki kozala ba-Metodiste te, bisu nyonso tokoki kozala ba-Pantekotiste te, bisu nyonso tokoki kozala te *oyo, oyo kuna*, to *oyo mosusu*, tokoyokana te. Kasi ntango naye epai na moto moko, ázala nganganzambe Katoliko to ázala nani, ntango azali na nsé ya Makila wana tozali bandeko, etali te epai nini ye azali, na ntango nyonso oyo azali na nsé ya Makila wana.

¹⁶ Sikawa, mwana mpate ya Yisraele oyo ebomami nde ezalaki eséngisi ya Yawe, mpe makila ezalaki elembo ete mosala esilaki kosalema. Nzambe asengaki yango mpo na lisiko, longwa na Ezipito, kokende na mboka na elaka, Asengaki nyama ebomami. Mpe nyama yango asengelaki kozala na . . . Makila ya nyama ekufi esengeli kotiyama likolo na ekotelo ya ndako mpe likolo ya ekuke, mpe yango ezalaki elembo ete eloko oyo Yawe asilaki kosenga ekokokisamaki. Bomoni? Sikawa, mwana-mpate azalaki elembo te, makila nde ezalaki elembo. Sikawa, bomoi esilaki kolongwa na mbeka, mpe sikawa makila ezalaki elembo. Mitindo na Ye esilaki kopesama. Makila etalisaki elembo, elembeteli ete mondimi oyo asalaki mpenza-mpenza oyo eséngisi yango ezalaki. Yango ezalaki elembo. Malamu, komona mondimi, kosambela, azalaki komikokanisa bongo ná mbeka na ye. Bomoni?

¹⁷ *Tala* ndako yango oyo, ná mosambeli, eséngisi ezalaki nini? “Bóboma mwana-mpate. Na mokolo ya zomi na minei sima na yango kobatelama, oyo ya—ya mobali ezangi litónó, Yisraele mobimba bakoboma yango, mpe makila ekokamatama na isope mpe ekotiama likolo na ekotelo na ekuke.”

¹⁸ Mpe kutu, isope yango ezalaki matiti lokola matiti nyonso. *Isope* elingi koloba “kondima na yo.” Moto moko alukaka kozala na kondima ya kokamwa koleka, yango nde ntina ozwaka lobiko na yo te. Kondima ezali na yango eloko moko lokola eloko nyonso. Ozalaka na kondima mpo na koya na losambo. Ozalaka na kondima mpo na kobima libanda. Ozalaka na kondima mpo na kopelisa motuka na yo. Ozalaka na kondima mpo ya kolia biloko na yo ya mpokwa. Nde lolenge wana nde ezalaka, kondima lokola kondima nyonso. Sikawa mpo na kotia makila, etiamaki ná isope, oyo ezali kaka matiti lokola matiti nyonso oyo ekólaka bisika nyonso na Palestine, kolakisáká ete kondima oyo, ete makila oyo esengeli kotiyama ezali eloko moko ya likolo koleka te oyo esengeli na yo kozala na diplome ya doctorat ya ndenge na ndenge mpo na kosala yango. Ezali bobele kondima lokola kondima nyonso, ya mokolo na mokolo, mpo na kondima Nzambe. Bomoni? “Pakola makila,” na kondima, “ná isope.”

¹⁹ Sikawa, mosambeli, na bongo, oyo amonani na nsé ya makila, etalisaki ete asilaki kokokisa bosenga ya Yawe, mpe amikokanisaki. Elembo etalisaki ete amikokanisaki ná mwana-mpate oyo abomamaki, oyo Yawe asengaki. Mosala esilaki kosalema. Oyo elilingi mpenza ebongi be ya lelo, ya Klisto ná

mondimi. Ntango elembo elakisami polele epai na mondimi, na bongo Ezotalisa ete yango esili koyambama mpe mosala esili kosalema.

²⁰ Na bongo, makila ezalaki elembo ya kotalisama polele, makila yango moko. Nyama etangaki makila, ekufaki, mpe makila na yango ezalaki na etutú. Sikawa, bomoi ya nyama, oyo ezalaki na kati ya makila. Mpe bomoi ezalaka kati na makila, toyebi yango. Biblia elobi bongo, mpe zébi etalisi yango polele, bomoi ezalaka na kati ya makila. Na bongo ntango nyama ezalaki kobomama, mpe bomoi ekabuanaki na nyama yango, makila esengelaki kozala chimie ya makila, mpo na kotelema lokola elembo. Mpamba te, bomoi oyo ezalaki kati na makila ekokaki kozonga likolo na mondimi te, mpo ezalaki bomoi ya nyama.

²¹ Mpe bomoi ya nyama ná bomoi ya moto ezalaka mpenza na bokesene. Ezali na eloko te, eloko moko te kati na yango. Soki ozwaki, ozwi makila ya nyama mpe batii yango kati na yo, okokufa. Na bongo bomoni, biso, ezali—ezali bomoi moko ya kokesene na kati ya makila ya nyama, na oyo ezali na kati ya makila ya moto, mpamba te moto azali na elimo. Nyama ezali na elimo te.

²² Mpe sikawa, yango wana, makila yango moko, bósosola sikawa, ete chimie ya motáné, ba-chimie ya makila, esengelaki komonana mpenza na ekuke, lokola elembo ete mwana-mpate esilaki kokufa, sikawa, mpamba te bomoi ya mwana-mpate ekokaki kozonga likolo na moto mosambeli te. Kasi lelo... Ezalaki bobele elilingi.

²³ Lelo, ezali te chimie ya Makila ya Nkolo Yesu, Mwana-mpate na biso, kasi ezali Bomoi oyo ezalaki kati na Makila, oyo ezali Molimo Mosanto. Ezali kozonga mpe ezali Elembo ete tosili koyamba mpe tosali mpenza-mpenza oyo Nzambe ayebisaki biso tósala. Na bongo, na kozwaká Elembo yango, tomikokanisi ná Mbeka na biso. Ebongi be mpenza. Nazomona te ndenge nini eloko mosusu ekokaki kozala polele koleka. Bomoni?

²⁴ Nzela bobele moko oyo moto nyonso akokaki koloba ete ndako wana mpe ezalaki, na nsé na makila, ezalaki mpo chimie ya makila ezalaki na bikuke yango. Balekelaki, Mwanje na kufa asengelaki kotala mpe komona makila. Sikawa, lisusu, ezalaki etaliseli ya Molimo Mosanto.

²⁵ Sikawa, bomoni, Makila mpenza ya Yesu ekokaki koya likolo na moko na moko na biso te, mpamba te Azalaki bobele na Makila na boiké esengelaki na nzoto na Ye. Mpe etangaki, longwa na nzoto na Ye, kino na mabelé, eleki mibu nkoto mibale; kasi yango te nde esengelaki kozala mpo na Elembo. Bomoi, Bomoi oyo ezalaki kati na Makila, nde ezalaki Elembo sikawa. Nakotalisa bino yango polele, na miniti moko, na nzela na Biblia. Ezali Elembo oyo esengeli koya likolo na moko na moko na biso,

mpo na kotalisa ete tokokisami na Mbeka na biso, mpe tosili kokokisa mitindo nyonso ya Yawe.

²⁶ Petelo alobaki, na mokolo ya Pentecote: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu, mpe bokozua likabo ya Molimo Mosanto. Mpo elaka yango ezali mpo na bino, na bana na bino, na baoyo bazali mosika, baoyo nyonso Nkolo Nzambe na biso akobenga.” Bomoni, ezali kolakisa yango kaka epai na bango te. “Baoyo nyonso Nkolo akobenga.”

²⁷ Ezali na ebele oyo bakanisaka ete babengami. Kasi baoyo nyonso “Nkolo” abengi! “Baoyo Ye ayebaki liboso, Abengaki bango; baoyo nyonso Ye abengaki, Alongisaki bango; baoyo nyonso Ye alongisaki, Asili kokembisa bango,” likambo esili na yango kokátama.

²⁸ Na bongo, soki ozwi moto moko oyo andimaka te ete Molimo Mosanto azali mpo na mokolo oyo, bomoni eloko nini bazali kosala? Bazali kowangana Elembo oyo ezali elembeteli mpenza ya kotalisáká ete okangani ná Mbeka na yo. Bomoni likambo nalingi koloba? Ezali mpenza pete soki otali yango kaka na—na lolenge oyo Nzambe asili kokoma yango sikawa. Makila ememaki biso mpe tozalaki. . . ezali kolakisa e—e elembeteli ya Molimo Mosanto, oyo azali Bomoi.

²⁹ Sikawa, bomoi ya nyama ekokaki kozonga kati na moto te, mpo elingaki kosimba te, bomoi ya nyama ezalaka na elimo te kati na yango. Bomoi ya moto ezalaka na elimo. Nyama ayebaka te ete azali bolumbu. Ayebaka malamú ná mabe te. Ye, bobele. . . Azalaka na—na molimo, kasi elimo te. Boye bóbosana te, sikawa, elimo ezali lolenge ya molimo, na ntembe te.

³⁰ Sikawa bótala malamú, kasi na bongo ntango Bomoi ya Mbeka na biso, Yesu Klisto, ntango Makila na Ye esopanaki. . . Azalaki Nzambe, atondisamaki kati na Moto moko. Sikawa, Akitaki longwa na kozaláká Yawe, mpo na komimonisa polele Ye moko lokola moto, mpo na komizwela Ye moko lolenge ya moto, mpo na kokokanisa biso elongo ná Ye. Azalaki Mwana-mpate ya Nzambe. Mpe na kati na Ye, esika oyo Makila. . .

³¹ Sikawa, nayebi ete moto moko alobi: “Azalaki makila ya Bayuda.” Boyokaka Bayuda koloba bongo. Azalaki Makila ya Bayuda te, mpe Azalaki makila ya Mabota mpe te. Azalaki Makila na Nzambe. Azalaki na Moyuda te. . . Azalaki Moyuda te mpe moto na mabota te. Azalaki Nzambe. “Mo—mo—mongondo akomema zemi.”

³² Sikawa, nayebi mingi kati na bino bato, mpe ba-Protestant bakanisaka ete líki yango ezalaki ya Maria. Mpe mbo—mboto ya makila oyo eyaka, bomoi eyaka na kati ya momboto ya makila. Mpamba te, nsósó ya mwasi akoki kobota líki, kozanga kozala esika moko ná ndeke ya mobali, ekopasuka te, mpamba te ezali na makoki ya kobota te. Bomoi eutaka na makila, oyo eutaka

na emoto mobali. Kasi na likambo oyo mobali azalaki te, boye, “bomoi kati na makila,” esengelaki kouta bobele na Nzambe, mpe Akelaki momboto ya Makila na libumu ya Maria. Nzambe Ye moko, Mokeli Ye moko, akelaki momboto ya Makila. Sikawa bótala. Balobaka, “Ee, ezalaki nzoto. Maria azalaki na líki.” Te, mesié. Azalaki na yango te; líki te. Soki ezalaki líki, okoki kozwa mboto ya mobali te kozanga boyóki na nzoto. Mpe soki Ye, ye mwasi azuaki boyóki na nzoto, wana bozali kosalisa Nzambe nini?

³³ Akelaki nyonso mibale líki ná Makila. Yango mpenza nde oyo Ye azalaki. “Tosimbaki Nzambe,” Biblia elobaki bongo. Timoté ya Liboso 3:16: “Na ntembe te, libombami ya bonzambe ezali monene: Nzambe amonisamaki kati na mosuni. Tosimbaki Ye na maboko na biso.” Nzoto wana ezalaki Nzambe. Na ntembe te, ezalaki bongo. Azalaki Nzambe likolo na nyonso, na lolenge ya moto.

³⁴ Sikawa tomoni na likambo oyo, ete ntango momboto ya Makila wana ebukamaki, yango ebimisaki Nzambe. “Nzambe azalaki kati na Klisto, kozongisa mokili na boyokani epai na Ye moko.” Epai wapi, moto mosusu akokaki kosala yango te, eloko mosusu ekokaki kosalema te; esengelaki Makila ya bulee wana, Ye moko. Nzambe asengelaki kokita, mpe kokóma moto mpo na komema mpasi ya mobeko na Ye Moko. Soki Yesu azalaki kaka mosakoli, moto moko ya kokesene ná Nzambe, na bongo Nzambe azali sembo te.

³⁵ Soki nakokaki koloba: “Tika ete Ndeko Grant ákufa mpo na lisumu moko oyo esengelaki nde Billy ákufa mpo na yango,” to eloko mosusu, etúmbu moko boye, wana ekozala sembo te. Soki nasalaki ete mwana na ngai moko ya mobali ákufa mpo na etumbu oyo ngai nakataki, ezali kaka sembo te. Ezali na boyengebene se moko oyo ngai nakoki kosala, ezali kozwa esika na ye, soki nalingi kobikisa ye.

³⁶ Mpe Nzambe asengelaki kokóma mosuni, mpo na kozua esika ya mosumuki; Nzambe amonisamaki kati na nzoto, ezalaki eloko moko te na nsé ya Nzambe Ye moko. Sikawa, awa Asilaki, komonisama kati na nzoto, mpo na kolongola masumu ya mokili. Mpe Amitalisaki Ye moko kati na biso, mpo tókoka kotalisama kati na Ye. Bomoni mwango na yango?

³⁷ Sikawa, tomoni kotalisama na biso elongo ná Mbeka na biso, Bomoi ya Mbeka kati na biso, yango ezali Molimo Mosanto. Ntango momboto wana ebukamaki, yango ebimisaki Nzambe, ebimisaki Nzambe, na lolenge ete Abulisaki libota moko ná Makila na Ye Moko mpe atiaki Nzambe kati na moto lisusu. Nzambe kati na bino, Bomoi na Seko!

³⁸ Mpe Moèla nyonso ya mayele mingi ayebi ete liloba yango, Bomoi na Seko, euti na liloba Z-o-e, *Zoe*, oyo elingi koloba “Bomoi na Nzambe Ye moko.” Ezali solo. Lolenge bobele moko

oyo okoki mpenza kozua Bomoi, ezali bobele na lolenge moko ya Bomoi na Seko, mpe yango ezali Bomoi na Nzambe Ye moko kati na yo. Bomoni? Na ntango yango ozali na Bomoi na Seko, mpamba te Ye azali Oyo-na-seko bobele moko oyo ezali. Mpe tozali biteni ya makanisi na Ye, liboso kutu kozalisama na mokili moko ézala to eloko soko nini. Nyonso oyo ezali bobele makanisi na Ye, mpe biso tozali kotalisama ya makanisi na Ye ya oyo ezalaki.

³⁹ Mpe Asengelaki kokita mpo na kolongola lisumu. Moto mosusu akokaki kosala yango te. Moko te alongobanaki mpo na kosala yango. Moko te akokaki kosala yango, bobele Ye, mpe Asalaki yango.

⁴⁰ Mpe bongo, ntango bomoi wana ebimisamaki na nzoto wana, Moto, oyo azalaki Mwana na Nzambe (Nguya ya bokeli na Ye ebongisaki ndako moko, lokola motongi-ndako nyonso, atongaki ndako oyo Akotaki na kati na yango, Ye moko, Nzambe asalaki yango.), na sima, ntango bomoi wana ekamatamaki, Makila, chimie na yango, esopanaki na mabelé, *kaka* ndenge oyo ya Abele esopanaki na mabelé, kasi longwa na Makila wana Molimo Mosanto ya Nzambe, mpe Yango etindamaki epai na moto na Mokolo ya Pentekote, mpo na kotalisama elongo ná Mbeka oyo ekufaki mpo na bango. Ezali na nzela mosusu te na mokili oyo tokoki kozwa yango. Elembo ya solo mpenza!

⁴¹ Tala, soki okweisamaki na etumbu ya liwa, mpe oyebacki ete okokende na chaise électrique, mpe mikanisela, koboya . . .

⁴² Dallas, bóyoka! Koboya Makila na Yesu Klisto, Elembo ya Makila na Ye, soki omoni Yango mpe oboyi Yango, okoleka na Kosambisama ná Makila na Ye na maboko na yo. Mosumuki, moto ya lingomba, bómikanisela likambo yango.

⁴³ Bongo soki Lee Oswald akokaki kozala na makoki, na mwa mikolo wana, ná kotoka wana liboso na Esambiseli Monene oyo esengelaki na ye kokutana na yango; mpe ayebáki sima ya koboma Mokonzi ya ekolo, ekozala na mawa ata moke te, ndenge mobali wana asengelaki komiyoka! Esengelaki kozala likambo moko ya nsómo. Atikálá kotelema liboso na likambo yango te, mpamba te moto mosusu wana abetaki ye masasi. Kasi kanisa kaka kofanda wana liboso na Esambiseli ya Likolo ya nkèle, ná makila ya mozalani na yo na loboko na yo, Mokonzi ya Mboka Amerika! Oyo wana ekozala likambo moke mingi, epai na bino bato oyo bozali kobwakisa Makila na Yesu Klisto, ntango bokotelema liboso na bisambiseli ya Nzambe. Ekozala kotoka mpenza ntango bokoyeba yango. Bakokaki kosala Oswald eloko mosusu te koleka kolongola bomoi na ye, kasi Nzambe akolongola yo Libela na libela liboso ya Bozali na Ye. Ekozala likambo moko ya nsómo. Bótala.

44 Soki esengelaki ete óya na bisambiseli, lokola mokweisami, okoluka molobeli ya malamú mpenza koleka oyo okokaki kozwa. Moto nyonso akosala yango.

45 Mpe moto nyonso oyo abotami na mokili, etali ngai te ndako ya malamú ndenge nini ye auti, azali mokweisami ya Makila na Yesu Klisto kino áyamba bolimbisi na yango. Mpe nzela kaka moko oyo okoyeba ete bolimbisi ezali solo, ezali ntango Elembo Yango moko etiami likolo na yo, na boye ozali na Elembo.

46 Tala, okweisami, mpe okoluka molobeli ya malamú koleka oyo okoki kozwa mpo na kolobela likambo na yo. Mpe soki nazalaki kokende na Esambiselo ya Nzambe, nalingi nganganzambe moko te, nalingi moto moko te; Nalingi molobeli ya malamú mpenza koleka oyo nakoki kozua mpo na kosamba likambo na ngai.

47 Tika náloba na yo likambo oyo, moninga na ngai Moklisto. Molobeli na biso azali mpe zuzi na biso, mpe zuzi na biso—na biso akomaki molobeli na biso. Likambo esili ntango toyambi bolimbisi na Ye. Mosambisi Ye moko akitaki mpe akomaki molobeli, mpe molobeli ná mosambisi azali se Moto moko. Nzambe akomi moto, na ntina ete Ákoka kolongisa moto na nzela na kufa na Ye moko oyo Atiaki likolo na ye. Aleluya! Elingi koloba, “Lokumu na Nzambe na biso!” Abongi na lokumu nyonso. Mosambisi na biso mpe molobeli na biso azali Moto moko.

48 Molimo Mosanto azali Elembo kotalisa ete tosili kolimbisama. Likambo esili. Epai na mobali mpe mwasi nyonso oyo asili mpenza kozwa libatizi ya Molimo Mosanto, amekamaki, asili kotalisama elongo ná molobeli na ye, elongo ná mosambisi na ye, elongo ná mbeka na ye, mpe Elembo oyo ye azali na yango ezali kolakisa ete motuya ya mobembo na ye na Nkembo esili kofutama. Amen. Esili nye. Asimbi Elembo yango. Ezali ya ye, libatizi ya Molimo Mosanto, oyo ezali motatoli ya lisekwa na Yesu. Amen. Bondimi yango? [Eyangelolo balobi :“Amen.”—Mok.] Wana nde kotalisama na yo, osimbi Elembo na yo.

49 Sikoyo soki ozali na Elembo wana te, okokota te. Osengeli kozala na Elembo. Yango nde motuya oyo esengami, “Ekomona Ngai makila, Makila ezali Elembo. Ntango Nakomona makila, Nakoleka likolo na bino.” Osengeli kozala na Elembo. Soki ozali na yango te, ee, okokende te. Esengeli na yo kozala na Elembo.

50 Soki elembo yango etalisamaki polele te, elembo yango elakisamaki kuna te, ata kondimana ezalaki na ntina te. Okoloba: “Boye, sikawa, Ndeko Branham, sikawa zela naino mwa moke.” Ezali mpenza ya solo.

51 Elembo ezalaki likolo ya kondimana. Mpo Yisraele azalaki na kondimana ya kokatama ngenga, mpe Moyuda nyonso akokaki kobima mpe kolakisa na moto nyonso, “Nakoki kotalisa

bino ete nakátámá ngenga, nazali Moyuda, nakátámá ngenga kokokana na mobeko na Yawe,” kasi ata bongo yango elongolaki ye te soki elembo yango mpe ezalaki wana te. Asengelaki kotalisa polele elembo yango. Bososoli yango? [Losambo balobi: “Amen.”—Mok.] Ye. . . Elembo esengeli kozala wana, ata ndenge nini. Mpe soki ozali kati na kondimana. . . Soki Moyuda moko alobaki: “Nakotia makila na ekuke na ngai te, nakoki kotalisa polele ete nazali Moyuda ya kondimana,” Mwanje na kufa asilanaki ná ye. Etali te boni ye azalaki sémbu, boni boni ye azalaki moto ya lingomba, ba-moko na zomi boni ye afutaki, ndenge nini alobaki ete andimaki Yawe; Yawe asengaki Elembo wana.

⁵² Azali mpe kosala yango lelo. Esengeli kozala. Esengeli ézala, “Mpamba te ezali na nzela mosusu te na nsé na Lola, nkombo mosusu te oyo epesami, na lolenge nyonso,” etali te malamumu ndenge nini, sembo ndenge nini. Elembo wana esengeli kozala wana, mpe kotalisama polele.

⁵³ “Makila,” bokoloba: “ee, nabomi mwana-mpate mpe nati yango kati na mbeki. Nafandisi yango na sima awa.” Yango nde likambo oyo Alobaki te. Esengeli kozala likolo ya ekotelo mpe likolo na ekuke. Esengeli kotalisama polele.

⁵⁴ Mpe bomoi na yo esengeli kotalisa polele ete Elembo ezali kati na yo. Oh, bino ba-Pentecotiste, likambo nini ezotambola malamumu te ná bino? Suki bakátá, bilongi bapakólá-pakólá, mibali ná masolo ya mbindo mpe makambo ya ndenge wana, epai nini yango ezotalisa Makila ya Nkolo na ngai Yesu Klisto ete ezali Elembo ya Molimo Mosanto? Bino, bozali na lolenge ya kosambela, mpe bozobenga “bondoki” mpe makambo mosusu nyonso, misala na Nzambe, “bondoki.” Ndenge wana nde bozali kotalisa Elembo?

⁵⁵ Balobaka, “Nazali Pente- . . .” Etali ngai te oyo yo ozali. “Ngai nazali Batiste. Nazali Pres- . . .” Oyo yo ozali etali ngai te. Elembo yango esengeli kozala wana. Nzambe asengi Yango, mpe eloko mosusu te bobele yango.

⁵⁶ Okoloba: “Boye, nazali na doctorat.” Etali ngai te ba-diplóme boni ozali na yango. Nzambe azosenga Elembo yango, mpe bobele Yango. Ezali elembeteli ete nzela na yo esili kofutama. Akozwa mikanda na yo ya lisanga te to eloko mosusu te. Asengeli na Elembo wana.

⁵⁷ Mokumbi ya bus akoloba, “Awa, zela moke, oyo wana ezali elembo na ngai te.”

⁵⁸ Moto ya mpepo akoloba, “Boye, kende kuna libanda sikawa.” Tiké ezali elembo. Okobima kuna mpe okoyebisa momemi mpepo, “Tala, nalingi komata na mpepo na yo. Motuya ezali boni?”

“Kende kozwa elembo na yo.”

“ Oh, nakofuta you.”

⁵⁹ “Nakoki kozwa yango te. Okokota na mpepo na ngai te kino okei kofuta motuya mpe ozwi Elembo. Nazoluka nde elembo.”

Okoloba: “Ee, natángá kelasi. Nasálá likambo *oyo* boye. Ngai. . .”

⁶⁰ Etali ngai te oyo yo osálá, osengeli kozala na Elembo soki te okokóta te. Amen mpe amen. Bozomona yango te? Nzambe asengaka Elembo wana. “Ntango Nakomona makila mpe bobele yango, nde Nakoleka likolo na bino ntango Nakomona elembo.”

⁶¹ Soki etalisamaki te, kondimana ezalaki kutu na ntina te. Moyuda moko akokaki mpenza koloba mpe komitalisa polele ete azalaki—azalaki Moyuda oyo akatamaki ngenga, akokaki kozua bandeko ya mibali elongo ná ye mpe koloba: “Bótala awa, nakatami ngenga.” Yango elingaki koloba eloko moko te.

⁶² Okoloba: “Nazali Metodiste. Nazali Batiste. Nazali Pentecotiste. Nazali *oyo*. Nazali *oyo kuna*.” Yango elingi koloba eloko moko te.

⁶³ Bosengeli kozala na Elembo. Mpe ntango Elembo eyáka, Etátolaka na ntina na Klisto. Alobaki ete Ekosala bongo. Mpe Klisto azali Liloba. Mpe ndenge nini bokoki kowangana ete Biblia ezali solo, eteni na Yango, mpe kokóba koloba ete bozali na Elembo, na ntango Elembo ezali litatoli ya Yesu Klisto? Bomoni, wana nde likambo oyo nazomituna.

⁶⁴ “Oh,” bokoloba: “Nandimaka te, Nandimaka ete mikolo ya bikamwa . . .” Oh, bótala, Elembo ezali wana te. Elembo elobaka “amen” na Liloba nyonso, nyonso, mpamba te ezali Nzambe Ye moko. Bomoni? Malamu.

⁶⁵ Kasi soki elembo ezalaki wana te, kondimana ezalaki na nguya te. Ezalaki kolongolama. Ndenge moko sikawa! Etali te boni—boni boni olobi, boni boni okolinga koloba: “Nandimaka Liloba moko na moko kati na Biblia,” okoloba, “Ndeko Branham, na—nakoki kotangela yo ndambo ya Biblia wana, Biblia mobimba, na motó. Nandimaka eteni na Yango moko na moko.” Ezali malamu. Satana mpe asalaka yango. Ah-ah. Esengaka Elembo!

⁶⁶ “Boye, Ndeko Branham, etutu na ngai etondi na ba-diplome. Nazali na Licence en Lettre, mpe nazali na diplome ya doctorat, mpe LLD. na Latin. Mpe, oh, nakomá ba-buku. Nasálá oyo. Nasálá nyonso. Nasálá—Nasalá makambo oyo nyonso.” Etali ngai te. Nyonso wana ezali mabe te, kasi ata bongo osengeli kozala na Elembo. Elembo, bobele Elembo nde esengami!

⁶⁷ Okoloba: “Nazali moyekoli ya Biblia. Nazali mo—nazali moto malamu. Nazali *oyo boye, oyo wana*.” Ekoki kozala malamu, likambo te, kasi ata bongo esengeli kozala na Elembo!

68 Sikoyo, kufa ebelemaki mpo na kobeta Ezipito na ntango nyonso, ndenge moko kufa ebelemi mpo na kobeta ekolo oyo sikawa na ntango nyonso.

69 Anna Jeanne, nazoyoka eloko moko lokola tata na yo, alobáká likambo moko ntango moko. Nalingaka yango ntango nyonso. Alobaki: “Boyebi, ekólo oyo, ná masumu yango moko, soki Nzambe atiki Amerika áponyoka na oyo azali kosala, na lisosoli malamú, ekosengela na Ye ásekwise Sodoma ná Gomora mpe ásenga bango bolimbisi, na ndenge atumbaki bango.” Ezali solo.

70 Bomikanisela, Yisraele afutaki mpo na masumu moko moko oyo asalaki, pelamoko ná biso. Ndenge tokomi mpenza makambo pete-pete? Bókembisa bibundeli! Bózonga epai na Nzambe, lingomba! Nazali koloba makambo oyo mpo na kokesene te. Nazoyebisa bino yango lokola likebisi. Bóndima!

71 Kufa ebelemaki mpo na kobeta. Nzambe asilaki kolakisa bango ngolu na Ye mpe mawa na Ye, na nzela na ba-nguya, bilembo mpe bikamwa (ndenge moko mpe Azali kosala lelo liboso ya konetola Lingomba), ata bongo bazali na mposa te ya kobongola motema mpe kondima nsango yango.

72 Bomoni, ezalaki na nsango moko kaka liboso ya bokei ya lingomba. Esengeli kozala bongo ntango nyonso. Ndenge moko lelo. Likambo nyonso ya molimo oyo ekómaka ezalaka elembo kouta na Nzambe. Bondimi yango? [Losambo balobi: “Amen.”—Mok.] Lokola Nsango, ezalaka na elembo moko, na sima nde Nsango elandaka elembo yango. Nzambe ayebisaki Mose, alobaki: “Soki bakondima mongongo ya elembo ya liboso te, ntango mosusu bakondima mongongo ya elembo ya mibale.”

73 Sikawa, ntango bozali komona bilembo kosalema, mpe nsango moko te sima na yango, kaka eteyelo moko ya kala oyo ya theologie mpe kokóba bongo, oyo wana eutaki na Nzambe te. Kasi epai oyo elembo ezali, Nsango moko elandaka yango. Sikawa bótala. Yesu akotaki na mosala . . .

74 Nazali nde kokanga bino matoi? To oyo nyonso azotala makambo ya micro oyo awa, ezoyokana lokola nde ezozónga. Ntango mosusu ezoyokana mwa makasi. Nalingi ete bósosola yango.

75 Ntango Yesu akotaki na mosala, Atikálá koloba mingi mpenza te na bato, moto nyonso azalaki na mposa na Ye na losambo na ye. “Oh, elenge Mosakoli oyo, tozali na esengo mingi ya kozala na Ye.” Azalaki kobikisa babéli. “Oh, nkembo na Nzambe. Nzambe asili kotelemisa Moto monene moko katikati na biso.” Ezalaki malamú. Boye mokolo moko ekomaki na esika moko . . . Yango ezalaki elembo na Ye.

76 Yisaya 35 elobaki ete ekozala elembo. “Motengumi akopumbwa lokola mboloko,” mpe bongo na bongo, “mokufi miso akomona.” Ezalaki elembo.

⁷⁷ Atalisaki polele elembo na Ye lokola Masiya, mpe bongo na bongo. Mpe bango, mingi kati na bango, balobaki: “Iyo, nakoki kondima oyo wana.” Na bongo, sikawa, soki yango ezalaki elembo, esengeli kozala na mongongo ya elembo yango. Mongongo sima na yango ezalaki nini? Ntango Abandaki kolakisa mateyo na Ye mpe kobenga bango banyoka kati na matiti. Ayebanaki lisusu te na bato kobanda ngonga wana, bomoni, ntango mongongo eyaki elongo ná elembo. Elembo ekendeki liboso.

⁷⁸ Mose akitaki na Ezipito elongo ná elembo moko. Abwakaki lingenda na ye na nsé, ebongwanaki nyoka. Yango ezalaki elembo. Kasi sima na mwa ntango, mongongo eyaki ná elembo. Na bongo ekomaki ndenge mosusu. Bomoni, balingi yango te. Mo—mongongo, esengeli kozala, kolanda elembo. Mpe yango ekokaki koya na ntango mosusu te bobele na ntango wana, mpamba te ezalaki ntango mpo na Makomi kokokisama. Bótala likambo oyo Ayebisaki ye, kuna na nzete ya kopela na móto, “Nasili komona mpe koyoka kogánga ya bato na ngai, mpe namoni minyoko na bango longwa na bakapita ya Ezipito, mpe Nakanisi lisusu elaka na Ngai oyo Napesaki Abraham.” Mibu nkama minei esilaki koleka, mpe Ayebisaki Abraham ete bakozala kuna. Bomoni, ekokaki kozala na ntango mosusu te. Esengelaki Mose áya kaka na ntango wana.

⁷⁹ Makonga ya sáa monene ya Nzambe ebetaka na kobonga be. Ekokende mbangu miniti moko te to ekotikala sima miniti moko te. Ekozala bobele mpenza na ntango esengeli. Malamu, bongo, bomoni, makambo nyonso ezalaki kotambola alima, ekokaki kokóma na ba-ntango mosusu te.

⁸⁰ Makambo oyo ekokaki mpe kokóma te na ba-ntango mosusu. Likambo oyo ekokaki kokóma na eleko ya Luther te. Ekokaki kokóma na ntango ya Wesley te. Mikolo ya ba-Batiste to ya ba-Methodiste, na mikolo na bango, ekokaki kokóma te. Esengeli kokóma nde sikawa. Yisraele esengeli kokóma ekólo. Mangomba esengeli kozala lokola ezali sikawa. Esengelaki nsango ya misato ézala, eleko ya misato ya lingomba. Esengelaki Laodikia ézala. Ekokaki kosalema te kino Pentecote éya mpe ésala makambo na bango, bábima mpe básala ebongiseli, mpe basalaki oyo basalaki. Na bongo nde yango esengeli koya, na sima nde Nkolo ayei, na ntango oyo babimisaki Ye libanda ya lingomba. Ye azali Liloba.

⁸¹ Bazali kobanga kobeta món dengé na Liloba wana bisika nyonso. Bakangi monoko kimia mpenza na ntina na likambo Yango, kasi ata bongo, bazali koswana na ntina na yango.

⁸² Awa na Chicago, eleki ntango molai te, ntango Nkolo apesaki ngai emononeli. Nazalaki na batei nkama misato kuna. Nalobaki: “Sikawa, nayebi eloko oyo bino...” na ntina na mombótó na nyoka, mpe bongo na bongo, Nalobaki: “moko na

bino zwá Biblia na yo mpe yaka kotelema pembeni na ngai mpe lakisa libunga yango.” Suka mpenza ya etónge ya bato ya kimia oyo otikálá komona te. Nalobaki: “Na boye bólongwa na mokongo na ngai.” Bomoni, ezali libanda na eteyelo ya makanisi na bango.

⁸³ Ata bongo, balobaka: “Ndeko Branham azalaka mosakoli ntango apakolami, kasi ntango epakweli etikaka ye, oh, nayebi te.” Oyo e...Oyo wana ezali elembo moko ya—ya—ya—ya theologien moko abulunganá! Mpenza... .

⁸⁴ Liloba oyo *mosakoli* elingi koloba “Momonisi na Bonzambe ya Liloba.” Liloba na Nkolo eyaka epai na basakoli. Ndenge wana nde Yesu atalisamaki. Mpe balobaki ete sima na lisekwa, balobaki: “Toyebi ete Azalaki mosakoli na Nzambe,” bomoni, “moto moko te akokaki kosala makambo oyo soki Nzambe azali na ye te,” boye balingaki koyamba nsango na Ye te. Balingaki koyamba Yoane te, kasi ye azalaki mosakoli. Balingaki koyamba Eliya te, moto moko te na baoyo nyonso batikali, mpe bazalaki na emoniseli ya Bonzambe.

⁸⁵ Liloba oyo, Liloba ya Anglais oyo, *prophet*, maloba ya Anglais ekoki koloba eloko ata nini, elingi koloba “motei.” Kasi soki olobi *mosakoli*, na Biblia ya kala, elingi koloba “momóni”. Mpe mikanda ya komindimisa na ye ezalaki ete, likambo oyo ye alobaki ekokisamaki, mpe yango ezalaki elembo ete azalaki mosakoli; ye mpe, oyo wana ezalaki elembo ete azalaki na emoniseli ya Bonzambe ya Liloba oyo ekomami. Na bongo Nzambe azokokisáká yango, sima na ye, etalisaki yango polele.

⁸⁶ Ndenge nini? Ee, esengeli kaka kozala bongo, esili. Nzela ya koleka na ngambo na yango ezali te. Nzambe alobaki ete ekozala bongo, mpe yango wana. Kasi yango nde likambo lelo, bomoni, Elembo yango esengeli kozala wana, oyo ezali kotalisa Liloba yango mpe ezali koyeisa yango mpenza solo. Bongo ndenge Alakaki, ndenge Abongisaki bato na Ye nyonso ya mboka na elaka, sikawa, ntango Alingaki kobanda esode oyo, oyo ezalaki elilingi.

⁸⁷ Sikoyo nakomeka kosilisa na miniti mosusu zomi na mitano, ntuku mibale, ná Liteya. Bótala malamú sikawa, nalingi ete bósosola likambo oyo, mpamba te ntango mosusu nakomona bino lisusu te, bomoni.

Bótala, sikoyo bótala ndenge Abongisaki bato na Ye.

⁸⁸ Bato boni bayebi ete Abongolaka ba-nzela na Ye te? Asalaka yango ata moke te. [Losambo balobi: “Amen.”—Mok.] Azali... sikawa bótala kati na Biblia mobimba mpe bómona soki atikálá kobongola yango ata mbala moko. Te, mobali.

⁸⁹ Ndenge nini Abongisaki bato? Liboso, Atindaki mosakoli ná elembo, nde ezalaki Mose. Ezali solo? [Losambo balobi: “Amen.”—Mok.] Mpe elembo ezalaki na nsango, nsango ya ko “milengele,” bazalaki kobima mpo na kokende na mboka oyo

elakamaki. Bongo Azalaki na kotalisama, ya mosakoli oyo, ete Pole moko ezalaki likolo na ye. Likonzi na Móto ezalaki kolanda mosakoli oyo, toyebi yango, alekaki na lisobe elongo ná Mose. Tososoli yango. Na sima Apesaki bango elembo mpo na kondimisama ete bazalaki na ntina ya kobanga te, ná kotungisama nyonso mpe motema likolo-likolo; esika Alobaki: “Ntango Nakomona elembo yango, Nakoleka likolo na bino.”

⁹⁰ Bótala ndenge Asalaki sikawa. Abongisaki liboso elembo, motindami, nsango etalisami, kotalisama ya motindami, mpe elembo mpo na kondimisama ete motuya ya nzela esilaki kofutama. Bazali na nzela na kokende na mboka ya elaka.

⁹¹ Likambo yango moko nde Asili kosala lelo! Asalaki nini? Atindelaki biso Molimo Mosanto. Molimo Mosanto azali Motindami, mpe kotalisama ya Makomi ya Ye moko ezali kotalisa Ye katikati na biso, ndenge moko lobi, lelo, mpe libela. Mpe Elembo ezali assurance. Eloko nini tozali kobanga? Tiké na biso esili kofutama mpe tomikokanisi ná Mbeka na biso. Akoki kobwakisa yo te. Alakaki yango. Tokokisami.

⁹² Yisraele kobima na Ezipito, ndenge nalobaki, ezali lokola Mwa—Mwasi na libala azali kobima na lingomba. Ntango Mose abandaki lotomo na ye, Yisraele mobimba basanganaki na Gosene, mpo na mabondeli mpe kosambela, ya solo mpenza, bautaki na bisika nyonso ya Ezipito. Yango nde lolenge Mwasi na Libala akosala, akobima longwa na ba-Unitaire, ba-Binitaire, ba-Trinitaire, ná bamosusu nyonso ya ndenge na ndenge. Akobima. Esengeli kosalema. Sikawa totangi awa na Baebele . . . Bisó sikawa, eloko ya liboso tosengeli kokanisa, kobima na bisika nyonso, “Bóbima na kati ya kozanga kondima.” Sikawa Molimo Mosanto alakaki ete akobenga yango na mikolo ya suka, “Bóbima na kati ya bazángi kondima.” Bótala.

⁹³ Tomoni na Baebele 10:26, nakomaki awa, elobi boye: “Soki tozali lisumu na nko sima ya kozwa boyebi ya Solo, mbeka mpo na lisumu ezali lisusu te,” bomoni, soki oboyi kondima na nko.

⁹⁴ Sikoyo soki botali, oyo nakoki koloba awa, soki bokotikela ngai mwa ntango moke kino nápesa etaliseli wana. Nakoki koyoka kati na Molimo, ete esosolami mpenza malamu te. Bomoni? Bótala.

⁹⁵ Tala Baebele awa, bazali na nzela na bango mpo na kobima. Nzambe aponaki bato zomi na mibale, to Mose nde asalaki yango, na loboko na Nzambe, mpo na kokende konóngá mboka; mpe kozonga, kozonga ná elembo ya mboka yango. Mpe ntango bakomaki kuna, zomi kati na bango babangaki makasi. “Ee,” balobaki, “Ba-amaleki wana kuna, tozali lokola mayoyo liboso na bango.” Yosua ná Kalebe bazongaki, bamemaki bilembeteli, “Tokoki kosala yango!”

⁹⁶ Bomoni, oyo wana ezali bandimi ya mondelo. Balekaki kati na makambo ndenge na ndenge, kati na lingomba, mpe

komibakisa na lingomba, mpe mabatisi ná mitindo. Kasi ntango ekomi likambo ya kokatisa ngambo mpe kokende kozwa Elembo yango, ndangá kotalisa ete Mboka ezali kuna, ete Bomoi. . . Yesu Klisto akufi te. Ezali na mosándá mosusu. Azali kobika kati na yango. Azali elongo ná biso, Azali sikawa kati na biso. Ntango ekomi na likambo yango, “ah,” bakokaki kondima yango te. Wana elekaki mpenza, bomoni. Mpe bazongaki, mpe bango, moko na moko, bakufaki kati na lisobe, moko te kati na bango akatisaki ngambo. Mpe, bomoni, soki tozangi kondima, biso ba-Metodiste, ba-Batiste, ba-Presbytérien!

⁹⁷ Nazolikya ete molakisi na ngai ya kala azali awa lelo. Docteur Roy E. Davis, mingi kati na bino boyebi ye, kaka awa na Fort Worth, ntango mosusu afandi awa. Nazoyeba lisusu tosololaki makambo oyo, eleki mibu ebele, ebele. Abatisaki ngai kati na kondima, na lingomba Baptiste Missionnaire.

⁹⁸ Mpe bótala, na kati awa, sikawa, soki to. . . soki—soki toyebi na mondelo ya mboka wana, mpo na koloba: “Na bongo, nkembo na Nzambe, nalobaki minoko na sika, aleluya!” Ezali yango te. Soki okoki koloba, kozanga kondima eteni moko ya Liloba wana, eloko moko ezali kotambola malamumu te ná ndenge na yo ya kobika makambo. Bomoni?

⁹⁹ Bopusani pembeni ya Mboka mpe bomoni ete ezali wana. Bomoni ete Yesu asili kosekwa. Azali na katikati na biso. Bozoyoka Liloba oyo ezolanda nsango yango, kasi ata bongo, bóndimi Yango te, boyebi likambo nini ekosalema? Na bongo bakufaki mpenza na lisobe. “Soko tokosalaka masumu na nko nsima na kozua boyebi na Solo, mbeka mpo na lisumu ezali lisusu te.” Yango nde oyo Buku ya Baebele eyebisi biso.

¹⁰⁰ Mpe sikawa bótala, wana ezali biso komona bilembo minene ya ntango na suka oyo Alakaki, koleka boni ezali kokebisa biso ete ntango ebelemi. Bótika kozanga kondima. Bósangana elongo. Tosengelaki kolingana bamoko na bamosusu mpe kondima, mpe tokabwana ná mokili.

¹⁰¹ Bótala, bazalaki kaka te kosangana elongo mpo na kosolola na ntina na nsango yango. Basengelaki kokóta na kati na yango, kokóta na nsé na makila. Ezali te koya koloba: “Boyebi, Mose ayebisaki biso, motindami, alobaki, ayebisaki biso ete tosengeli kozala na makila. Bokanisi nini na ntina na yango, bandeko?” Ezalaki yango te. Bomá mwana-mpate, mpe tia makila kuna likolo!

¹⁰² Tokoki koya mpe kofanda mpe kokende elongo ná Liloba, mpe makambo mosusu nyonso, kasi tozangi Elembo wana, ekosunga biso na nini? Ezali na ntina te. Kota na nsé na Yango. Azalaki na mokumba ya moto moko te libanda na nsé ya makila wana. Mpe Azali na mokumba ya moto moko te, lelo, oyo azali libanda ya nsé ya Elembo.

103 Libota mobimba, ebatelamaki bobele ntango bazalaki na nsé ya elembo, mpe elembo etalisamaki. Libota mobimba! Bondimi yango? [Losambo balobi, “Amen.”—Mok.] Lelo tosengelaki kokanisa lisusu likambo yango, libota. Bana na biso!

104 Mpe ekeke oyo ya bolenge mpe ya bolema ná mabina ya rock-n-roll ná makambo tozali koleka kati na yango, mpe ná ba-Beatles mpe ba-nyama mike nyonso awa, boye boyebi ete oyo nyonso etalisami awa na kati ya Buku, ya Biblia? Elobi yango na Emoniseli. Na ntembe te, elobi yango. Ndenge bato, bango, bazali—bazali. . . bango, bango, bomoni, bango, bazali te. . . Basili kokufa. Bakoki kotelema te. Batikálá kozala Seko te. Bazalaki ata na Makanisi te, na bongo bakokufa. Bakosila mpo na libela, kosila nyonso nye mpenza. Bakozala na etumbu mpo na ntango ebele na ebele, mpo na makambo oyo basalaki, kasi eloko nyonso oyo ezalaki na ebandeli ezali na suka.

105 Ezali ete oyo ezali na ebandeli te, ezali na suka te. Lolenge ya Bomoi na Seko ezali bobele moko. Lolenge ya Bomoi na Seko, tozali kobunda mpo na yango. Bótala.

106 Yosua, mokapo ya 2 ya Yosua, mwasi na pite ya Mabota oyo andimaki ayokaki, mpe libota na ye, mpe amemaki bango na nsé ya nsinga motane, oyo ezalaki elembo kouta na batindami ya Yosua. Mwanje mobebisi ya Nzambe amémiaki elembo yango, mpe bobele yango, kati na engumba wana. Ezalaki na eséngisi ya Nzambe, na nzela ya basali na Ye, nde Nzambe asengaki elembo oyo, mpe ezalaki bobele oyo wana. Etali ngai te soki ezalaki moyangeli ya engumba, soki ezalaki moto mosanto koleka na engumba, soki bakendeki na lingomba monene koleka na engumba, nyonso na kati ya mboka ekweyaki kasi ndako wana te. Nzambe, ye moko, amemiaki elembo wana.

107 Bótala, Yeliko basilaki koyoka ete Nzambe azalaki kosala makambo minene, kasi bazangaki kosala keba na likebisi yango.

108 Pela moko lelo ná bato oyo bazoyoka oyo Nzambe azosala na mwa mibu eleki oyo, kasi bazosala keba na yango te. Nguya monene oyo ya ngolu mpe bilembo, ndenge Alakaki, “Ndenge ezalaki na mikolo ya Sodoma, ekozala mpe bongo.” Ndenge Alakaki ete likambo yango ekozala! Bótala likambo oyo esalemaki na Sodoma. Bomikanisela, oyo wana ezalaki elembo ya Sodoma. Kasi motindami, ya Malaki 4, asengeli “kongozonga mitema na bato epai na ba-tata, ba tata ya Pentecote, kozonga na Biblia.” Eloko mosusu koleka Biblia, ekoki kozala te. Oyo nde emoniseli mobimba ya Nzambe.

109 Mpe moto moko akoloba: “Malamu, nandimaka eteni *oyo*, nayebi te mpo na oyo Wana.”

110 Motindami ya solo ya Nzambe akozongisa bino na Likambo yango mobimba! Bomoni? Bótala, yango nde eloko oyo Molimo Mosanto asalaka, kongozonga yo na Liloba nyonso ya Nzambe.

111 Ngolu na Ye esilaki komonisama, kosambisama na Ye ezalaki kolanda. Basengelaki kondima ete bazalaki na bokéngelami na kati ya ba-ndako minene ya ba-denomination na bango oyo bazalaki na yango na Yeliko, kasi bamonaki ete esimbaki te.

112 Esengelaki kozala na mwa ba. . .ntango mosusu bakotaki kuna na ndenge moko boye, ezalaki na bilenge mibali mibale to misato oyo bakotaki kuna, mpe balobaki ete básangisa elongo momboto nyonso ebongisámá liboso. Mpe azwaki. . .mpe asalelaki ndako na ye lokola losambo, mpe ayambaki batindami yango; na sima amemaki baoyo nyonso na engumba na ye, oyo balingaki kondima, na nsé ya elembo.

113 Mwasi moko kati na nkita monene nyonso wana! Mwasi moko ya moke, mpe akendá nsango mabe, ntango mosusu balóngólá ye na mangomba nyonso ya engumba, kasi andimaki motindami yango. Mpe motindami yango atikaki elembo, elembeteli, mpe Nzambe amemiaki elembo yango. Ezali mpe bongo lelo. Bomikanisela naino, ntango nkanza ya Nzambe ya kobebisa wana eyaki, ebongiseli monene wana ekweaki, elembo ebatelaki ndako na ye na bokéngi. Ezali te mpo azalaki mwasi moko malamú; ezali mpo azalaki na kondima mpe atiaki elembo.

114 Sikawa bongo soki alobaki: “Iyo, bango bazalaki bato malamú, na ntembe te, nasepelaki mpenza na liteya oyo bapesaki, kasi, na bosembo, ezomonana lokola na ntina te kotia singa wana édiémbela libanda ya lininisa na ngai, nakokótisa yango na kati?” Elingaki kokweya. Elingaki kokweya. Nzambe amemiaki bobele elembo, ndenge moko na elembo ya bomoi oyo ezalaki na Ezipito.

115 Yosua azalaki elilingi ya Yesu, mpo *Yosua* elingi koloba “Yawe-mobikisi.” Azalaki elilingi ya Yesu, azalaki sembo na elembeteli ya elembo oyo motindami na ye ateyaki. Yosua atikalaki sembo na elembeteli ya elembo yango. Oyo nyonso na nsé na yango ebikisamaki, na Ezipito. Oyo nyonso oyo na nsé na yango ebikisamaki, na Yeliko.

116 Makila ya Mwana-mpate ezali etaliseli lelo ya Elembo, ete Molimo Mosanto azali Elembo ya lelo. Oyo nyonso ezali na nsé na Yango ebatelami. Oyo nyonso ezali libanda na Yango ebatelami te. Na Baebele 13:10 mpe 20, Abengami “kondimana ya seko.” Kondimana ya kala ezalaki eloko moko, oyo ezali ya Sika, oyo ezali “kondimana ya seko.”

117 Nzambe, bilaka na Nzambe oyo ekangami na Makila, ezokomisa biso nsómi na masumu ná nsóni, mpe kokesenisa biso ná oyo nyonso ya mokili. Bozali na ntina ya koláta na ndenge ya kokesene te; moto nyonso akoki koláta na ndenge ya kokesene. Esengeli ózala bongo na kati, ya kokesene. Bomoi ezalaka na kati; na moláto te, koláta te. “Bokonzi na Nzambe ezali likambo ya kolia mpe ya komela te, to koláta ya monzele; kasi ezali

motema molai, boboto, bopolo, motema molai, kati na Molimo Mosanto.”

¹¹⁸ Sikawa, bilaka ekangolaka na masumu, ezali kolakisa ete Nzambe ayebi te—ayebi lisumu na yo te. Dawidi alobaki: “Esengo na moto oyo Nzambe akotangela ye masumu te.” Mpe Nzambe akotangela lisumu ata moke te na Elembo wana, mpamba te Elembo ezali elembeteli oyo efutami ete Nzambe asili koyamba yango. Mpe bozwi elembo mpo na yango, motu- . . . kondima na yo esili kosomba yango. Mpe ozali na ntalo ya lisiko na yo kati na nzoto na yo, mpo na kosambela Ye mpe kotalisa bilaka na Ye mpe nguya na Ye.

¹¹⁹ *Kondimana na Sika* elingi koloba “boyokani ya sika.” *Makila* elingi koloba “Bomoi.” Kondimana na Sika ezali kondimana ya Molimo Mosanto, Molimo Mosanto ezali kopesa litatoli koloba ete Yesu Klisto asekwaki longwa na bakufi, etalisaki ete Yesu Klisto ayanolaki na bosenga nyonso mpo na biso, mpe azali na bomoi lelo. Elembo ezotalisa polele ete Azali na bomoi mpo na komikokanisa Ye moko ná biso, kokokana na elaka na Ye. Sikawa ndenge nini moto akoki kotánga Biblia mpe komona ete Alakaki yango, mpe komona Klisto kozonga na mikolo oyo ya suka na lolenge ya Molimo Mosanto mpe komitalisa Ye moko na bomoi? Yango nde Elembo. Yango nde elembeteli. Yango nde motúya efutami.

¹²⁰ Bótiaka motema na eyóki moko ya nzoto ata moke te. “Nayokaki malili kokita ngai na mokongo. Mpe—mpe na—nayokaki nsolo ya eloko moko; namonaki makila na maboko na ngai,” to mafuta. To—to: “nazwá Diplome ya Graduat.” To: “nabíná na Molimo. Nagángá. Nalobaki minoko na sika.” Makambo wana ekoki kozala malamau. Nazali na likambo moko te ya kotelemela yango, kasi yango nde oyo nazali kolobela te.

¹²¹ Nazali kolobela nde kotalisama ya Elembo, Yesu Klisto, asekwaki mpe azali kati na biso sikawa, komitalisáká Ye moko, mpo na kotatola lisusu Liloba na Ye ya elaka ya mikolo oyo. Amen. Na bongo yo ná Klisto bokómi moko. Nzambe ná Klisto bazali moko. “Na mikolo wana, bino bokoyeba ete Ngai nazali kati na Tata, Tata kati na Ngai; Ngai kati na bino, mpe bino kati na Ngai.” Nzambe atalisami na nzoto ya moto, komitalisáká Ye moko na bomoi, sima na mibu nkoto mibale. Yango nde Elembo.

¹²² Soki bozali na kati te, bókota na lombangu mpenza, baninga. Ekoki mpe kozala ete ntango esili koleka mpenza. Toyebi te.

¹²³ Kolakisa Bozali na Ye, Kondimana na Sika, Makila. Mpe Ezali na bomoi sikawa, kokokisáká matatoli yango. Mpe lokola Ye azali, biso tozali na makoki ya nyonso oyo Ye asombaki mpo na biso. Moto oyo azali na libatisi ya Molimo Mosanto, to mwasi oyo azali na libatisi ya Molimo Mosanto, azali na makoki na biloko nyonso oyo Yesu asombaki mpo na biso, mpo yango nde elembo oyo tozali na yango. Yango nde nguya ya kosomba.

124 Tóloba ndakisa, olobi: “Malamu, Ndeko Branham, olingi koloba nini?”

125 Awa, mpo na kokómisa yango polele sikawa, mpe nalingi ete bino babeli bósosola likambo oyo. Bótala, soki nazalaki kokufa na nzala, mpe nayebi ete eteni ya lipa, toloba, ezali na motuya ya lopáta centime ntuku mibale na mitano, mpe ndeko moko ayei mpe alobi: “Lopátá ya centime ntuku mibale na mitano yango oyo, Ndeko Branham. Ozali kokufa na nzala; zwa lopátá oyo.” Sikoyo, boyebi, nakoki kozala na esengo ná lopáta wana na loboko na ngai kaka ndenge nakoki kozala ná lipa na loboko na ngai, mpo nazali na motuya ya kosomba yango. Nazali na elembo oyo ezwaka lipa. Mpe lipa yango ezali mpenza wana; mpe eloko moko ezali ete, nasimbi elembo, lopáta oyo esombaka lipa, Nakoki kozala na esengo ná elembo yango kaka ndenge nakoki kozala ná lipa yango.

126 Sikawa, soki ozali na libatishi ya Molimo Mosantu, yango ezali Elembo kotalisa ete ozali na eloko nyonso ya lisiko oyo Yesu akufelaki, ezali ya yo, ezali na loboko na yo. Ozali kobanga kosenga yango?

127 Soki natii yango na libenga na ngai, mpe nalobi: “Ee, nayebi te soki nakoki kosomba lípa wana to te,” Nakokufa na nzala. Kasi bómikanisela, motekisi alobi: “nazali na eséngisi moko, Mr. Branham. Ná lopáta moko ya ba-centime ntuku mibale na mitano, okoki kozwa lípa mobimba.” Nazali na yango! Amen. Yango ekati likambo.

128 Yango nde ntina oyo tozomona te makambo mingi kosalema lelo, Elembo ezotalisama polele te, Elembo ya solo-solo. Oh, tozali na lolenge nyonso ya lokuta, kasi nalingi koloba Elembo ya solo-solo.

129 Bótala, boye ntango tososoli mpe totalisi Elembo, Bomoi oyo esengelaki mpo na Elembo, Makila ezali kolobela biso. Bomikanisela, Makila ya kondimana eyebamaki elongo ná Elembo, mpe Liloba epesi biso kondimisama ya elaka. Elembo ezali elembeteli ete bosómbami esili kosalema mpo na biso.

130 Sikawa, soki ozwami na kati na yango te, boye, na ntembe te, okozwáká eloko moko te; ozali kaka koya kati na molongo ya mabondeli, mpe kozonga lisusu; komata na etumbelo, kotómbola miso, kozóngá lisusu.

131 Kasi, oh, ndeko, ntango Elembo yango etiami mbala moko na—na—na motema na yo, mpe oyebi ete ezali lisekwa ya Yesu Klisto kati na yo, eloko moko ezali kosalema. Ezali na eloko moko te oyo ekozongisa yo. Oyebi esika yo ozali. Botosi mobimba na Liloba na Nzambe nyonso ekopesa yo makoki ya kozwa Elembo, mpe eloko mosusu te. “Esengo na ye oyo asalelaka Mibeko na Ye nyonso, akoki kozala na makoki na Nzete na Bomoi.”

¹³² Na bongo, ntango tozali kobondela, tosengeli kozala na Elembo mpo na kotalisa elongo ná mabondeli na biso. Sikawa bózanga komona likambo yango te. Ntango ozali kobondela, osengeli kozala na Elembo ya kosimba ná libondeli na yo; soki ozali na yango te, koba kobondela kino Elembo éya, mpamba te opesami elaka te ya kozwa yango. Bomoni, osengeli liboso kozala na Elembo oyo; yango nde motuya ya kosómba, kondima na yo mpo na kondima yango.

¹³³ Sikawa, elembo ya botosi mobimba. Kobánga esili. Polo alobeli biso ete: “Makila ezali koloba makambo ya malamú koleka.”

Okoloba: “Makila elobaka?” Iyo, Makila elobaka.

¹³⁴ Na Genese 4:10, tomoni ete Nzambe alobaki ete—ete Kaina. . . to, “Makila ya Abele ezalaki kogánga longwa na mabelé.” Tomoni na Baebele 12, ete: “Makila ya kondimana ya Klisto ezali koloba makambo malamú koleka oyo ya Abele.” Bomoni? Tomoni ete Makila elobaka mpenza, Elobaka na ntina na yo. Bomoi oyo ezali kati na yo ezali koloba longwa na Makila oyo esopanaki. Amen. Oh, ndeko! Nakosepela ete bato nyonso bakoka komona yango. Bomoni? Soki okoki komona oyo yango ezali, ezali Bomoi oyo ezali kati na yo. Bomoni, Makila wana ezali kokokanisa yo ná Yango. Ezali Elembo. Ma. . . Ezali nini, Makila esopanaki mpo na yo; oyambi yango, mpe Bomoi esili kokota kati na yo. Ozali na Elembo, yango nde Molimo Mosanto.

¹³⁵ Bongo ntango tozobondela, tosengeli kozala na Elembo mpo na kotalisa elongo ná mabondeli na biso, ndenge nalobaki, mpe sikawa tóndima mpo na biso moko mpe tótia Elembo na libota mobimba, lokola na Ezipito, Yeliko, to mpe na Misala 16:31. Tomoni ete Polo ayebisaki soda Moroma, ete: “Yo ndima, mpe ndako na yo mobimba ekobikisama.” Tia yango likolo na libota na yo. Soki ozali na mwana moko oyo abikisami te, tia mpenza Elembo likolo na ye, loba: “Nkolo Nzambe, nasengi ye.” Tikala bobele wana. Soki ozali na mama to molingami moko oyo abungi, tia Elembo yango likolo na bango, loba: “Nkolo Nzambe, nasengi yango.”

¹³⁶ Bimisa libanda, bosoto nyonso ya mokili, libanda na ndako na yo, mílengela mpo na likambo Yango. Túmbá ba-kupé na yo. Bwaka ba-mésa ya ba-masano ya kaláti na yo. Bwakisa makáyá na yo. Bwaka kozanga kondima na yo ná mikanda na yo ya lingomba na kati ya linzanza ya fúlu, na esika ebongi na yango. Amen. Na ntango wana nde obandi komilengela. Na sima, okosala nini? Na bongo tia Elembo na libondeli, ná ndangá ya solosolo, kondima ya solosolo. Tia Yango, tia Yango elongo ná kondima nyonso. Ntango otii Elembo, yeba ete osili kopetolama. “Soki mitema na biso ezali kokweisa biso te, na bongo tozui lilómbo na biso.”

137 Na ntango nyonso oyo bozali kosala makambo oyo ezali mabe, ndenge nini bokosenga Nzambe asalela bino likambo moko, na ntango oyo boyebi ete bozali na libunga? Nde ntina tozali kaka kotatabana kokende mpe kozonga. Nazoloba likambo oyo te mpo na kosala mpasi. Nazoloba likambo oyo mpo na kosembola, mpo na kotia makambo na molongo. Ndenge nini bokotonga yango likolo na makálo ya Sodoma ná Gomola? Bózonga!

138 Makita mpe batei batiki bato básala eloko nyonso, mpe bátuna bango eloko te, mpe bátia kaka nkombo na bango na buku mpe bábénga bango *oyo, oyo wana*, mpe *mosusu*, nzokande ezali kozanga ngolu. Mpe ekomi mpenza na esika oyo kondima ezali eloko moko oyo ezali ata te. . . ekomi kutu mpenza mpasi mpo na koyeba ata eloko oyo yango ezali. Bango, bazali na elikya, kasi kondima te.

139 Bosengeli kozonga, na esika oyo, makambo nyonso ézali ya kokómbama mpe ya kopetolama. Na sima kamata Elembo na yo, oyo oyebi ete ezali Yesu Klisto kati na yo, na sima tia Yango. Soki eloko moko esalemi te, eloko moko ezali kotambola malamumu te; zonga lisusu, ozali na eloko ya mabe na loboko na yo. Alakaki yango. Azalaki Ye oyo apesaki elaka yango. Bótia Yango. Bótánga Baefese 2:12, na ngonga moko, soki bo—soki bolingi, mpe bokomona yango kuna.

140 Bótala mpe na Baebele 9:11. Polo alobaki: “Kosalela Nzambe na bomoi, ná maloba na bomoi.” Ezali koloba kaka te ete nakokende lokola Moebele amesanaki kosala, akozwa mbeka na ye, akamati nzela, ná ngombe monene ya mafuta, mpe atii maboko na ye likolo na yango mpo komikokanisa na yango, mpe asopi makila, azongi molongisami. Yawe nde asengaki yango. Asalaki yango. Na bongo libota oyo elandaki, ntango mosusu bakomaki mwa malili; moto mosusu akomaki mwa malili koleka. Eloko ya liboso boyebi, ekomaki na yango momesano ya libota.

141 Yango nde oyo pentecote esili kokoma mpo na biso, momesano ya libota. Tokofanda wana, mpo na koloba: “Emission wana ya televizio ezalaki mpenza kitoko na mpokwa oyo, boye te? Nazomituna likambo nini basalaki kuna na losambo? Nkolo Yesu, bikisa. . .” Oh, mawa! Bomoni? Ezali momesa- . . . ya libota. “Boyebi, nalobaki minoko ya sika mokolo mosusu wana. Nazali moto ya *oyo*, to *oyo kuna*, boyebi. Ah-ha.” Oh, ezali momesano ya libota!

142 Boyebi likambo nini Nzambe alobaki? Nzambe alobaki: “Mafuta na bino mpe ba-mpate mibali na bino ezali nsolo mabe na zolo na ngai. Ya solo, mbeka na bino ekómi nsolo mabe.”

143 Ndenge moko mpe mpo na ba-mbeka ya ba-Pentecotiste, mpe bisálásala ya ba-denomination na biso nyonso, mpe basi na biso ná mibali bazosaláká motindo oyo bazosala, lolenge ya kosambela; bakobeta miziki, moto moko akopumbwa-pumbwa

mpo na mwa ntango; mpe esuki bongo, lokola mbéki ya mai basopi likolo na yango, soki Liloba na Nzambe esakolami mpe elobi eloko moko. Likambo yango ezali nini? Mbeka na bino ebandi kolumba nsolo mabe liboso na Yawe.

¹⁴⁴ Mpe ezalaki na ntango wana nde Yisaya akotaki na mosala, mpe ayebisaki bango: “Nakopesa bino elembo ya seko, mongondo akokumba zemi.” Bomoni, yango wana mpenza. Ezali te lolenge ya libanda mpe bindimeli ya kokufa, te; kasi maloba na bomoi nde, Nzambe na bomoi oyo asekwaki longwa na bakufi, mpe azali na bomoi katikati na biso.

¹⁴⁵ Bamosusu kati na bango, mangomba oyo ya motindo wana, oyo bandimaka makambo oyo, bazali kowangana ete eloko moko lokola Elembo ezalaka. Ee, moto moko amekaki koyebisa ngai: “Bobele bantoma zomi na mibale nde bazwaki Molimo Mosanto. Nde nyonso oyo ezalaki. Iyo.” Oh!

¹⁴⁶ Kasi biso baoyo tondimaka Liloba, toyebi ndenge mosusu, toyebi ete oyo ezali Bozali ya bomoi. Mpo ndenge nini toyebaka ete ezali Bozali ya bomoi ya Klisto, Molimo oyo ezali katikati na biso? Esalaka makambo moko Ye asalaka. Yango nde ndanga na yango. Mowiti eyebanaka na mbuma oyo ebotaka. Na sima soki mowiti ya liboso wana ebimaki mpe bakomaki Buku ya Misálá sima na yango, mpe eloko moko oyo Yesu asalaki, bantomá basalaki yango; bongo ntango mowiti yango ekobima lisusu, ekosala bobele eloko yango moko. Bomoni, Baebetele 13:8 elobi ete Azali motindo moko, oh la la, etalisi polele ete Nzambe asekwisaki Ye mpo na biso, kokokana na Liloba na Ye ya elaka. [Maloba mazangi na eteni oyo ya bande—Mok.]

¹⁴⁷ Elembo ya elaka! Baefese 4:30 elobi: “Bóyokisa Molimo Mosanto na Nzambe mawa te, botiami elembo kati na ye kino mokolo na bino ya lisiko.” Ezali te kino ntango ya kolamukisa oyo ekolanda. “Kino mokolo ya lisiko na bino!” Wana tobatisami kati na Yango, kokokana na Bakolinti ya Liboso 12. Mpe kati na Ye, ezali litondi, mpe lisumu moko te eyebanaka kati na Ye. “Ye oyo abotami na Nzambe asalaka lisumu te. Momboto na Nzambe ekoumelaka kati na ye, mpe akoki kosala lisumu te.” Ndenge nini akoki kosala yango, na ntango oyo Elembo ezali wana? Elembo ezali elembetele ete asili kondimama.

¹⁴⁸ Mpe, boye, okoloba: “Nasali lisumu.” Malamu, boye otikálá kozwa Elembo te. Bomoni?

¹⁴⁹ Elembo ezali epekiseli, elakisaka ete motuya yango esili kofutama. Soki Satana ameki kopesa yo yango. . . Bókanisa naino likambo oyo. Soki Satana ameki kopesa yo bokono moko, to ameki kopesa yo eloko moko, oyebi eloko nini ya kosala? Lakisa ye Elembo na yo. Ya solo mpenza, bokono ebétaka Moklisto. Lakisa ye Elembo na yo, mpe talisa ye polele ete ozali eloko oyo esombami ya Nzambe. “Bótemela zabolo, mpe

akokima bino.” Bósimba Elembo likolo na kondima na bino oyo eninganaka te na Liloba na Ye elakami.

¹⁵⁰ Na ntango moko Nzambe apesaki elembo ya monama lokola elembo. Nalingi kosilisa. Apesaki elembetele ya monama lokola elembo. Natikali bobele pene na miniti zomi, na sima tokozala na molongo ya mabondeli. Atikálá ntango nyonso sembo na elembo yango. Boye te? [Losambo balobi: “Amen.”—Mok.] Asalaka yango kaka. Mibu nkoto na nkoto nyonso oyo, Atikálá ata mbala moko te, na ntango moko te, kozánga kotalisa yango polele. Azalaki sembo na elembo yango, ezotalisa biso ete Ye atikálá. . . mpe akotikáláká kozánga te kotalisa bilembo na Ye. Etali ngai te soki ezali. . .

¹⁵¹ Soki Yesu ayei te liboso na mbula nkoto zomi, ozali na Elembo, Akokóba kaka komemia Yango. Ata makambo boni ekobongwana, mpe likambo mosusu nini, Asengeli komemia Elembo wana. Alobaki ete Akosala yango. Malamu mingi. Azali kotalela biso sikawa ete tótalisa Elembo na Ye polele, likolo na kondima oyo epesameli biso na Nzambe, epai na eyamba nyonso ya kozánga kondima na ekólo mpe na mokili, oyo endimaka ete bilembo mpe bikamwiseli elandaka bandimi te. Mpe bózála sembo na Elembo oyo, mpe Ezali kolakisa ete motuya esili kofutama mpe tosili koyambama mpo na lisekwa, wana tozali na Bomoi ya Elembo na kati na biso.

¹⁵² Ezali Liteya moko oyo ezokata-kata, kasi ezali Solo. Yango nde tosengeli na yango, ezali Solo. Nzambe ázunga biso tóyeba Solo. “Bokoyeba Solo, mpe Solo ekosikola bino.” Natatoli ete Yesu Klisto azali ndenge moko lobi, lelo, mpe libela. Nandimaka ete Nzambe apesaka Molimo Mosanto lokola Elembo, sikawa mpenza, liboso mpenza ya esode, ya—ya Mwasi na libala oyo azobima na lingomba.

¹⁵³ Nandimaka ete makambo ya nyamu-nyamu eleki mingi, mpe bato bazali koloba ete bagangaki, balobaki minoko na sika. Nandimaka makambo wana; kasi okoki kotiela yango motema te. Ndenge nini okoki kotiela yango motema, bongo na sima kowangana Liloba? Bomoni?

¹⁵⁴ Elembo ezali Liloba etalisami kati na yo, kobikáká Yango moko. Wana Nzambe nde azali molimboli na Ye Moko. Ozali na ntina ya koloba te: “Ee, sikawa, ólimbola minoko na ngai.” Ezali yango te. Alimbolaka bomoi na yo na nzela na Liloba. Ntango Ye azwi liloba na yo, oyo yo ozali, mpe atalisi Liloba na Ye na nzela wana, ezali na bosenga ya ndimbola moko te, esili kozala wana. Nzambe asalaka ndimbola ya Ye moko, mpe tosilá kozwa bilaka oyo mpo na mokolo.

¹⁵⁵ Oh, Dallas, bino etónga ya Baklisto balingami, bómemama te na makambo oyo ya lelo, oyo bozali komona kosalema zingazinga, mpamba te ekobeba nye. Bóbeta Elembo wana ntango nyonso, bótalisa polele Elembo yango. Bótanga Biblia.

Kamata nyonso. Mpe soki molimo na yo kati na yo elobi “amen” na Yango te, boye ekozala malamú ózonga, óbongola oyo ozali na yango, mpo na Elembo; ozali na Yango te.

¹⁵⁶ Nayebi ete oyo wana ezali makambo ebele ya koloba awa sima ya nzanga moko. Mpe ezali sika-sikawa ngonga ya minei na ndambo. Ntango ekoki sikawa, mpe soki tokoki kobima na ngonga ya mitano ná molongo ya mabondeli.

¹⁵⁷ Bondimi ete Yesu Klisto azali na bomoi mpe azali kokonza lelo? [Losambo balobi: “Amen.”—Mok.] Bondimi ete likambo oyo nayebisi bino ezali Solo? [“Amen.”] Ezali Elembo, eséngisi. Nakoki bobele koloba oyo ezali Solo. Nazali bobele koloba oyo nazali komona, oyo nazali koyoka, oyo emonisameli ngai. Mpe ntina oyo nazali koloba oyo, na nkoto mbala nkoto na nkoto, ata mbala moko te ezángá kozala solo, sikawa, oyo wana esengeli kozala Nzambe. Yango esengeli kozala Nzambe. Ee, Nzambe akokaki nde kopesa lotomo ya ndenge wana na moto oyo ayebaki te eloko nini azolobela? [“Te.”] Akomitalisa Ye moko mpenza lokola momóni kuna, bongo na sima ábaluka mpe ápesa ye Liloba moko ya mbilíngá-mbilinga? [“Te.”] Moto oyo akowangana Yango, nde ye oyo azali na mbilíngámbilinga. Mpe Nzambe azalaka na mbilíngámbilinga te. Nzambe azali molimboli na Ye Moko.

¹⁵⁸ Bózwa Elembo! Bótelema te likolo na komikotisa na lingomba moko to lolenge moko, to eloko mosusu nini. Bózwa Elembo! Bósimba Yango. Yango nde eloko bobele moko oyo Nzambe akoyeba. Ntango okokoma na ngonga wana, ntango ekokoma na likambo ya liwa na yo, ekozala malamú ósimba Elembo wana likolo na yo moko; koyeba ete na mokolo ya boyei na Ye, ya lisekwa wana, nakoki kotalisa Elembo yango. Ekozala na nzoto oyo te, epolaka nyonso; kasi na Molimo oyo, oyo ekoki kokufa te, ezali Bomoi na Seko, Elembo efandaka wana. Mpe Alakaki: “Nakosekwisa ye lisusu na mokolo ya suka.”

¹⁵⁹ Yesu Klisto moko wana azali awa. Ye azali Motindami. Azali . . . Tala Nsango yango *oyo*, mpe Ye azali Motindami awa mpo na kotalisa Nsango na Ye. Ngai nazali Motindami te. Ye nde azali Motindami, mpe *Oyo* nde Nsango yango. Mpe soki ozali na molimo oyo ezali koyokana ná *Yango* te, ndenge nini yango ekoki kozala Motindami ya Nsango yango? Bobele Elembo nde ekotalisa Yango polele. Amen.

¹⁶⁰ Namiyoki lokola mosambeli. Namiyoki mpenza bongo. Nazali koyoka lokola nakoki kopumbwa mpenza be sasaipi, mpo nayebi Nani ngai nasili kondimela, mpe nasili komona bomoi na ngai komikokanisa ná Ye elongo kati na lisekwa na Ye. Bozali na Ye ezali awa. Bóyamba Yango, baninga, nabondeli bino mpenza, na kati na motema na bino.

¹⁶¹ Nayebi ete biso nyonso toyaka zingazinga na etumbelo mpe tobondelaka. Oyo wana ezali likanisi ya kala ya ba-Methodiste.

Batisálá yango ata moke te kati na Biblia. Biblia elobaki: “Baoyo nyonso bandimaki bazwaki libatisi.” Ya solo. Kati na Biblia, eloko lokola kobenga bato na etumbelo ezalaka te. Wana ezali eloko moko biso tobakisá, oyo ezali na yango malamumu. Eloko nyonso oyo Nzambe apambolaka, ezalaka na yango malamumu.

¹⁶² Lokola bapokolaka bilamba. Eloko ya ndenge wana etikálá kozala kati na Biblia te. “Bazwaki longwa na nzoto na Polo matambala ná biteni ya bilamba.”

¹⁶³ Kasi ndenge nyonso oyo bolingi kosala yango, ezali malamumu, na kiti na bino, na etumbelo, ézala epai wapi. Eloko moko kaka, tiá Yango, Elembo mpo na yo. Na bongo mitálá yo moko, mpe tálá lolenge ya bomoi nini ezotalisama, tálá soki Esili kotiyama to te. Soki Etiyami te, boye tiá nyonso oyo ozali na yango, pembeni, mpe zonga, kino Elembo étiyama.

¹⁶⁴ Tóbondela. Tata na Likoló, ntango mosusu na—na—nalobi na ndenge ya makasi mpenza, kasi, Nkolo, sété ekosimba ndenge nini soki ekangisama malamumu te? Nabondeli, Tata, ete ékangisama kati na mitema na bato, na lolenge bámona ete ezali eloko moko ya pambalapambala te. Ezali te ete nazali komeka kotalisa ebongiseli moko boye, to etóngá moko boye, eyamba moko boye, moto moko boye, to ngai moko, to moto mosusu. Ezali nde Yesu Klisto. “Nakobwaka bibongeseli nyonso wana esika moko,” bazali ndenge moko mpe bakokani bamoko na bamosusu, kokokana na Liloba na Yo. “Mobange mama mwasi ya pite,” Biblia na Emoniseli 17, “azalaki mama na bana basi nyonso ya pite.” mpe bakokaki kozala mobali te. Bazalaki basi ya pite, mpe bango nyonso bamikotisaki na mbeto ya makambo ya mokili. Mpe tomoni yango kosalema, ba-Pantekotiste ná bamosusu nyonso.

¹⁶⁵ Kasi, Yesu, Yo otikali bobele Yesu. Kotika bango koyoka nsango ya lingomba te; kasi Nsango ya Klisto, Liloba. Tika ete Ómimonisa Yo moko, Nkolo, lelo, elongo ná bandimi. Bikisa babéli nyonso. Limbisa masumu na biso, Nkolo. Na—nabondeli, lokola mosali na Yo, limbisa masumu na ngai, mpe limbisa masumu ya bato oyo. Nazolikya mpenza, Nkolo. Moko na moko na bango na ntembe te basungaki mpo na makabo oyo, mpo na—kofuta ba—ndako oyo, mpe basaleli mosolo na bango, mpe basili—basili—basili kosala nyonso, Nkolo. E Nzambe, nabondeli ete ata moko na bango te ázanga yango, Nkolo. Tika ete moko na moko!

¹⁶⁶ Na—nazali kosala yango na bosembo, mpe ata bongo, Nkolo, Yo osengeli kopamela. Toyebi, kosembola ezali bolingo. Bolingo esembolaka. Mpe nabondeli. Mpamba te yango nde ntina oyo Yo esembolaki bato na Yo, ezalaki mpo ete Olingaki bango, mpe lisumu nyonso esengeli kofutama.

¹⁶⁷ Mpe, Tata, nabondeli ete Ólimbisa masumu na biso sikawa, wana tozali koyámbola yango. Tosilaki kotángwa mosika mpenza, Nkolo. Natalisami elongo ná bato ya Pentecote oyo,

Nkolo. Na—nazali moko na bango. Mpe na—nabondeli, Nzambe, ete Ólimbisa biso nyonso. Mpe zwa ndambo ya bakambi oyo mpe bongola bango, mpe—mpe tika ete bátala kuna na ngambo ya Kalvari mbala moko, na bongo bakobosana oyo etali oyo bango basengeli kozala, moyangeli monene to episkopo, to oyo nyonso ekoki kozala, mpe koyeba ete tozali bato minene te kati na Bokonzi oyo. Bisó nyonso tozali bana na Nzambe. Nabondeli ete Ósunga biso sikawa. ómimonisa Yo moko katikati na biso, lelo. Tosengi na Nkombo na Yesu Klisto. Amen.

¹⁶⁸ Sikoyo liboso tóbanda molongo na mabondeli, ekoki kozala na moto moko awa oyo atikálá kozala awa te liboso. Nayebi te nani yo ozali, kasi Nzambe ayebi yo. Soki nasili koloba Solo, tika ete Nzambe átalisa yango polele, soki ezali Solo to te, yango nde elembetele na yango. Soki Asili kosekwa longwa na bakufi, Azali motindo moko lobi, lelo, mpe libela. Alobaki na Yoane 14:12: “Ye oyo akondimela,” ezali te ye oyo akomeka kondima. “Ye oyo akondimela Ngai, misala mizali Ngai kosala, akosala yango mpe lokola.” Ezali solo?

¹⁶⁹ Moto moko alobi: “Bokosala yango koleka oyo.” Ya solo. Alobaki: “Malamu, biso toteyaka Nsango-malamu, ezali monene koleka.”

¹⁷⁰ Bósala kaka misala misalaki Ye, yango ekondimisa ngai, bomoni, na sima nde tokosolola na oyo ya minene koleka. Nakoki kolakisa bino makambo ya minene koleka oyo Azali kosala sikawa koleka oyo Asalaki ntango Azalaki na mokili, mpe wana ezali kaka koteya Nsango-malamu, mpe te; wana ezali na bilembo mpe bikamwa. Ntango ezali te mpo na yango. Bóndima kaka. Mpe tika ete Nzambe ya Likolo, Oyo asekwisaki Yesu Klisto longwa na bakufi, mpe atalísi Ye awa na bomoi, epai na biso, sima na mibu nkoto mibale, átalisa polele Nsango oyo, ete Ezali na molongo. Elembo esengeli kotiamá.

¹⁷¹ Sikawa, bino baoyo bozali na bokono mpe mitungisi, bóbondela, na bosembo nyonso bóloba: “Nkolo, nandimi ete Ozali ‘Nganganzambe Monene oyo akoki kosimbama na bolembu na biso.’ Mpe toyebisami na mosali oyo awa ete Yo ozali elongo ná biso, na ngonga oyo, na bongo nalingi ete Ózala elongo ná biso mpe Ómitalisa polele.” Sikoyo bóbondela, moko na moko na bino.

¹⁷² Sikawa, etikali likambo ya Nzambe mpo na koloba likambo moko. Ntango nini oyo! Oh la la! Nakosepela ete bóyeba likambo moko, ndenge oyo ozali komiyoka ntango Yango eyei, mokili mobimba ekomi ya yo. Amen. Molimo mabe moko te ekosala eloko moko, esilá kolóngama. Nkolo na ngai azali awa. Nyonso ezali na maboko na biso. Amen.

Nasengi bino bózála mpenza kimia. Bótambola-tambola te. Bófanda kimia.

173 Bino baoyo bofandi na ba-kiti ya bibosono, mpe bongo, bókanisa te ete bozangi lisungi. Bóndima. Bo—bo, bosila koleka na milongo ya mabondeli, mpe ekweá mpe ekweá lisusu. Ezalaki te ete motei oyo abondelaki mpo na yo, nde akweaki. Ezali kondima na yo, mpe obandi kokanisa ete okosala eloko moko te. Yo ndima.

174 Tala, Pole oyo ezali awa, likoló na elenge mwasi moko ya moindo oyo afandi awa, oyo atele mi ná maboko na ye likoló *boye*. Iyo. Ozalaki kobondela. Iyo. Ondimi ete nazali mosakoli na Ye, to mosali na Ye? Nasengeli koloba yango te, mpo ebetisaka bato libaku mingi mpenza. Ozali na malamumu ya . . .

175 Oyo ezali mondele moko awa, mwasi ya moindo, kaka ndenge ezalaki na Nkolo na biso Yesu ná mwasi na liziba-na-mái, bikólo mibale ya kokesene. Ayebisaki bango ete bokeseni ezalaka te kati na langi ya mposi. Langi na biso ya nzoto na biso ezali na likambo moko te kati na yango. Bisu nyonso . . . Tokoki kopesana makila bamoko na bamosusu. Nzambe asalaki, longwa na makila moko, bikólo nyonso.

176 Ozali na mpasi na motó, mpasi na motó ya kafukafu. Mpe ozali na mokumba na motema na yo, ezali mpo na mwana wana. Mpe yo. . . Ezali oppression. [Ndeko mwasi alobi: “Amen.”—Mok.] Ezali mpenza bongo. Ezali solo? [“Amen.”] Ezali solo.

177 Mwasi oyo afandi na ngambo oyo longwa na yo awa, azali komonana lokola ete akokani na yo, azali mama na yo. [Ndeko mwasi alobi, “Amen.”—Mok.] Ezali solo. [“Nzambe asanjolama!”] Mpe azali na eloko moko oyo ezali kotambola malamumu te epai na ye.

178 Ondimi ngai, madame? [Mama alobi: “Amen.”—Mok.] Ondimi? Mitungisi na yo ezali mpasi na mopanzi na yo. Ya solo. Ezali mopanzi na yo na ngambo ya mobali nde ezali kosala mpasi. Boye te? Tombola loboko, soki ezali bongo. Ekotungisa yo lisusu te. Ondimi ete soki Nzambe akoki koyebisa ngai nani yo ozali? Mme. Lowell. [“Amen.”] Ya solo. [“Amen.”] Malamumu, koba nzela na yo, Nkolo Yesu apesi yo bosenga na yo.

179 Na ngambo oyo na suka ezali na mwana mwasi mosusu ya moindo afandi, azali kotala, ezali kaka—kaka lokola nde ékosilisa ye mpenza. Azali kotala ngai sikawa. Andimi yango. Ete, bozali komona Eloko yango wana pembeni na ye te? Azali kotungisama na mpasi ya lilongo. Ya solo. Nyonso esili sikoyo; Abikisi yo. Amen.

180 Mpo na nini bozondima te? “Soki bokoki kondima, nyonso ekoki kosalema.” Bondimi yango? [Losambo balobi, “Amen.”—Mok.] Tala . . . Bótala bato moindo! Wapi kondima na bino, bino mindele?

181 Tala mwasi moko ya moindo oyo afandi awa, azotala ngai, mwasi moko ya monene boye. Azali na mpasi na libólóngó na

ye. Azali mpe na mpasi moko, azali na bokono ya motema. Iyo. Mpe azali na motema kolemba, mpe kobeta nokinoki ná makambo ya ndenge wana, mingi-mingi ntango ozoluka kolala, mpéma kokangama. Bomoni? Yango esalemaki lobi na mpokwa. Mikanisela, nazotanga makanisi na yo te, kasi nayebi likambo oyo obondelaki. Olingaki óbengama mpo na likambo oyo, lelo, mpe Asili koyanola yo. Sikawa yo mpe ozali kotelema na mpasi mpenza, mpo ozali kobela mingai. Ezali solo. Mpe sima na yango, eloko mosusu, ozali na mitungisi na líkundú, yango ezali eloko moko ya kovimba na kati ya likundu na yo. Ezali ya solo. Sikawa, ondimi ete nazali mosakoli na Ye? Nakoloba yango, ata bongo. Ndima, mpe okobika.

¹⁸² Bongo bokono *na yo* ya líkundú? Ondimi ete Nzambe akobikisa mpe mpasi na yo ya líkundú, efandi yo wana? Ondimi yango? Malamu, na bongo okoki kozwa lobiko ya líkundú na yo. Amen.

¹⁸³ Olingi kotika komela makaya, kuna, mwasi? Ondimi ete Nzambe akosala ete ótika komela makaya? Omeká kotika yango ntango molai mpenza. Ozali mpe na mpasi ya líkundú; ozalaki komeka kotika makaya. Yango nde ezali kopesa yo mpasi na líkundú. Okotika yango? Nakangoli yo na yango, na Nkombo na Yesu Klisto, mpo na kondima na yo kosimba Ye.

Nabeti mondengé ná bino ete bóndima Nzambe!

¹⁸⁴ Tala mwasi moke afandi wana azobondela mpo na ye . . . molingami na ye moko na lopitalo, azali kobunda na liwa, ná cancer. Ya solo. Ezali noko moko. Ya solo. Ozali to . . . Ozali mwasi ya motei. Ondimi na motema na yo mobimba, mobali yango akobika.

¹⁸⁵ Nabeti mondengé ná bino ete bóndima Nzambe! Ezali nini? Kotalisama ya Yesu Klisto. Okoloba: “Klisto azali nini?”

¹⁸⁶ Azali Liloba. “Na ebandeli Liloba azalaki, Liloba azalaki mboka na Nzambe. Mpe Liloba akómaki mosuni mpe afandaki kati na biso.” “Liloba ezali na mopotu koleka mopanga ya mino mibale, esosolaka makanisi mpe mikano ya motema.” Bokoki komona te ete Liloba esili koya katikati na biso na mikolo ya suka oyo? Ezali Molimo Mosanto azozwa Liloba na Nzambe mpe azotalisa Yesu Klisto polele, oyo azali Elembo. Amen. Bondimi? [Losambo balobi: “Amen.”—Mok.]

¹⁸⁷ Bato boni bazali na ba-kaláti ya mabondeli? Tika ete bato nyonso na ngambo *oyo* baoyo bazali na ba-kaláti ya mabondeli, bátelema na molongo epai oyo *awa*. Bótelema kaka, baoyo nyonso na ngambo kuna, kaka na ngambo kuna bótelema awa kati na molongo. Te, kaka na molongo ya ngambo ya loboko ya mobali, bolimbisi, kuna kaka. Baoyo bazali kosunga, bótelema na esika na bino. Boye ntango tokosilisa ná bango, tika ete bamosusu bátelema, sima na bango koleka, ekozala lisusu bongo

mpe ná ngambo mosusu. Sikawa tika ete bato nyonso bázala na limemia.

¹⁸⁸ Molimo Mosanto azwaki bokonzi ya liyangani oyo, boye makambo mingi esilaki kolobama mpe esalemaki mpo na kotalisa polele. Bato boni bandimi ete Azali awa? Bato boni bandimi ete ezali Elembo? Bato boni bandimi ete ezali Liloba? [Losambo babandi kosepela—Mok.] Bótala, bato boni bayebi ete Buku ya Baebele elobaki, ete: “Liloba na Nzambe esósolaka makanisi oyo ezali na motema”? Bato boni bayebi yango? Bato boni bayebi ete yango nde ntina oyo Yesu akokaki kososola makanisi na mitema na bango, mpo Ye azalaki Liloba? Bato boni bandimi yango? Bato boni bandimi ete yango nde likambo oyo ezalaki ná basakoli? Bango bazalaki baoyo Liloba eyaki epai na bango. Sikawa soki Liloba ezongi epai na biso, Ekosala ndenge moko te? Bongo ndenge nini Liloba oyo etalisaka Liloba polele, ekoki kozala na libunga na nzela ya Liloba? Oh, mawa! Limemia!

¹⁸⁹ Tala, mwasi oyo afandi awa, azali mpe na eloko moko na motema na ye. Nauti kaka kobaluka mpe nasimbi likambo yango. Ezali yo nde Mme. Grant, boye te? Nayebaki yango ata moke te. Kasi ozali Mme. Grant, mpamba te namoni yo na yango. Ozali na motema likolo-likolo, yango nde ezali kotungisa yo. Ozali na, mwana na yo ya mobali azali na eloko mosusu... makila na ye, lokola, ezali kotanga. Nabeti mondengé ná yo ete óndima yango! Amen. Azali Nganga ya makambo. Azali Mokonzi ya liwa.

Tóbondela.

¹⁹⁰ Nkolo Yesu, wana Bozali na Yo ezali kopakola biso, awa kati na ndako oyo, mpe toyebi malamú ete oyo ezali Molimo Mosanto, Nabondeli, Nkolo, ete Óbikisa moto nyonso oyo akolata matambála oyo.

¹⁹¹ Ntango moko, tolakisami kati na Biblia, ete bato na Yo, kaka mpenza na nzela ya mosala, bazalaki kokatisa Mbú Motáné, mpe mbú ekangelaki bango nzela, wana ezalaki bango na nzela kokende na mboka na elaka. Nzambe atalaki na nse uta na Likonzi na Móto, ná miso ya nkanza, mpe mbu ebangaki, ezongaki sima, mpe Yisraele akobaki kokende na mboka na elaka, bazalaki mpenza na molongo ya mosala.

¹⁹² E Nkolo Nzambe, tika ete miso na Yo étala na nzela ya Makila ya Yesu Klisto, kati na Elembo awa oyo tosimbi likolo na matambála oyo lelo. Mpe tika ete moto nyonso oyo akolata yango, tika ete bokono ébánga, tika ete ézonga sima mpe tika ete bato na Yo bákatisa kino na elaka ya bokolongonu ya nzoto. “Libondeli ya kondima ekobikisa mobeli.” Na Nkombo na Yesu Klisto, tika ete ésalema bongo. Amen.

¹⁹³ Batei bandimi ya ba-Methodiste boni bazali awa, batei ya ba-Batiste, batei ya ba-Presbytérien, Batei ya ba-Batiste, ba-

Lutherien, to ba-Pentecotiste? Bato boni kati na bino bandimi ete Oyo ezali Solo? Bóya awa mpe bótelema pembeni na ngai wana tozali kobondela mpo na babeli. Bóya awa, bino batei nyonso oyo bozondima.

¹⁹⁴ Ezali malamumu, boye te? Ndeko Grant, ezali malamumu? [Ndeko Grant alobi: “Solo mpenza.”—Mok.] Iyo.

¹⁹⁵ Yaka awa, ndeko. Ndeko Grant azali na lotomo moko ya kobondela mpo na babeli. Moto ya mpiko, moto malamumu, moto oyo Nzambe ayokaka mpe ayanolaka na mabondeli na ye, Ndeko Grant. Nazali na esengo ya kozingela ye na loboko na ngai lelo mpe koloba ete, azali mpe ndeko na ngai. Sikawa akokita awa mpo na kobondela elongo ná ngai.

¹⁹⁶ Ntango bozali koya kati na molongo oyo, kaka lokola nde bozali koya na nsé na ekulusu. Bandeko, bósala milongo mibale awa, awa mpenza. Bósala milongo mibale; bamoko likolo awa, bamosusu na nsé kuna.

¹⁹⁷ Ndeko Roy Borders, ozali wapi? Ndeko Roy Borders, nakanisaki ete azali awa. [Moto moko alobi, “Akozonga kala te.”—Mok.]

¹⁹⁸ Bótala awa, epai na batei, bolingi kosala bongo! Bótala kuna. Yango ezali kosala ete námiyoka malamumu, bandeko. Batei ya ekulusu, bato oyo batelemi awa mpo na komikokanisa ná Nsango oyo. Eloko nini ekoki kosalema?

¹⁹⁹ Sikawa, bótala, bótia yango sikawa likolo na basali te. Bayei mpo na komikokanisa bango moko. Ntango okoleka awa, ómikok- . . . simba Elembo liboso na yo, “Nkolo Yesu, nasili koyambola masumu na ngai. Na ngala na yo, Opesi ngai libatishi ya Molimo Mosanto. Nazali eloko esombami. Lisumu, bokono to eloko moko te ekoki kopekisa ngai bandá lelo. Nazali kokende liboso.” Simba yango, oh, liboso na yo, mpe leka na kati awa, mpe Nzambe akobikisa mpe okobima awa na kosepela, esengo, mpe koma malamumu. Bondimi yango? [Losambo balobi: “Amen.”—Mok.]

²⁰⁰ Sikawa moto nyonso na kati awa, tógumba mitó, bandeko, wana tozali elongo. Toyebi te likambo nini ekosalema. Toyebi na biso te. Ntina moko ezali te ete moto moko ná bokono ábima na ndako oyo sima ya nzanga oyo. Simba Elembo yango na motema na yo, leka na yo na molongo ya mabondeli oyo, epai wapi batei, oyo babonzeli bomoi na bango mpo na—mpo na mosala, bakotelema awa, bakotiela bino maboko wana ezali bino koleka.

Okoloba: “Mpo na nini osálaki yango, Ndeko Branham?”

²⁰¹ Nalingi ete bino, moko na moko, boyeba nde ete . . . Nazali mobikishi te. Mibali oyo bazali na makoki ya kobondela mpo na babeli lokola moto mosusu nyonso. Na bosémbo, Nandimi ete Nzambe akoyanola mabondeli na bango liboso Áyanola oyo ya ngai. Nalembe mpe makasi masili ngai, mpe nyonso

wana. Na—nandimi ete Akoyanola mabondeli na bango. Mpe awa batelemi mpenza na katikati na yango mpenza, mpo na komikokanisa bango moko, bayoki nsóni te ya kozua esika na bango. Nasepelaka na bato ya ndenge wana.

²⁰² Sikawa, bandeko, nayebi komiyoka na bino. Nazali, nazali moko ná bino. Nazali moko oyo abwaki monyama elongo ná bino, awa na Texas, komeka kokanga moko na moko ya mbisi oyo Nzambe asilaki kobongisa mpo na Bomoi, kuna. Nazali kosala makasi na ngai nyonso. Nazali elongo ná bino, mokama likolo na mokama. Mbala mosusu napamelaka mpe nalobaka makasi na ntina na ebongiseli mpe bongo na bongo. Yango elingi koloba te ete natemelaka bino, ndeko na ngai. Nalingi koloba ete natemelaka motindo oyo elingaka kokabola biso mpo tózala bandeko te, na ntina na malakisi ya eyamba moko boye. Tozali bandeko na nzela ya libatisi ya Molimo Mosanto. Tosimbi Elembo yango moko. Tosila kozwa makila yango moko, boye tika ete tóndima yango. Tokoki kokutana Kuna (bongo te?), bandeko, biso nyonso na nsé ya Makila.

²⁰³ Sikawa, nabulisamaki lokola motei Baptiste. Ntango mosusu ozali Metodiste, to Lutherien, to Prebysterien, Pentecotiste, Unitaire, Binitaire, Trinitaire, to oyo nyonso ozali na yango, Lingomba na Nzambe, to ézala eloko nini. Yango ezosala bokesene moko te. Soki tokoki koyokana na makambo mike wana te, boye tóbosana yango.

²⁰⁴ Eloko moko tokoki koyokana na yango, ezali ete Yesu Klisto Mobikisi na biso akufaki mpo na masumu na biso, asekwaki mpe apesi biso Elembo. Tozali awa elongo ná mabondeli na biso, mpo na kosimba yango likolo na bandeko mibali mpe bandeko basi oyo bakoleka na molongo oyo. Nakondima yango na motema na ngai mobimba.

²⁰⁵ Namoni likambo moko kosalema mpenza. Amen. Nayebi ete bozokanisa ete nazali liboma, kasi nazomiyoka malamú ná liboma yango. Nazali kaka kolikia ete nakoki kotikala motindo oyo. Iyo, mesié. Nazali komiyoka na ngai malamú mpenza boye.

Tóbondela.

²⁰⁶ Nkolo Yesu, nazokita longwa na etumbelo oyo, awa, mpo na komikokanisa ná bandeko oyo. Nazomikokanisa ngai moko ná bango, ndenge biso nyonso tozali kosimba Bilembo na biso na maboko na biso, mpe na mitema na biso. Wana tozali kotosa motindo na Yo, “kotiela babeli maboko, mpe bakobika.” Tika ete moto nyonso oyo akoleka awa, bátalisa Elembo na bango, ete basíli kozwa Molimo Mosanto, ete bazali mwana na Nzambe oyo abotami mbala ya mibale, ete bandimaka yango na motema na bango mobimba. Mpe wana ezali bango koleka awa, tika ete bálakela mabe bokono mpe motungisi ya nzoto na bango. Mpe tika ete bábima awa lelo na kosepela, na koyebáká ete kondima na bango ebikisi bango.

207 Mpe, Nkolo Nzambe, lokola na Kondimana na Kala, tosili kotia, maboko na biso likolo na mbeka, mpo na komikokanisa na mbeka, tozali kotia maboko na biso likolo na Yesu Klisto mpe komikokanisa biso moko elongo ná Ye. Atiaki maboko na Ye likolo na biso sikawa, na lotomo, komikokanisa Ye moko ná biso, na nzela ya bilembo mpe bikamwiseli. Mpe tozali kotiela babeli maboko, mpo na komikokanisa ná bango, ná kondima na biso oyo ekangami ná bango elongo. Bokono esengeli kokende, mpe tika ete ésala bongo na Nkombo na Yesu Klisto, wana tozali kopusana awa mpo na koyamba yango.

Tika ete eyanganelo mobimba bábondela.

208 Roy to moto moko áya awa kotelema pembeni ya micro oyo, mpo na kobatela milongo yango alima.

209 Bótala, wana bozali koleka awa sikawa, bóya na kondimaká, bóya na kobondeláká. Tokotia kaka maboko likolo na babeli. Boya koleka. Bóbondela. Bóbondela. Ntango bozali koleka na kati na molongo ya batei oyo, soki bozali kotambola na makútele, bókítisa yango mpe bótambola. Soki ozalaki na cancer, bokono, loba: “Monganga asili kosala nyonso oyo akoki kosala, asili kosala nyonso oyo akokaki kosala, mpe alobaki ete nakokufa. Nakokufa te. Elembo na ngai yango oyo, Nkolo. Olakaki ngai mibu ntuku sambo. Nazali koleka kati na yango awa, nazali kosala yango.” Bomoni, bósala yango. Bokosala yango? [Losambo balobi: “Amen.”—Mok.] Na Nkombo na Yesu, tika ete ésala bongo. Amen.

210 Malamu, tika molongo yango ékoma koleka. [Ndeko Branham ná batei bazali kobondela mpo na babeli, wana ndeko moko azali kokamba eyanganelo na koyemba *Ndima Kaka* mpe banzembo mosusu. Maloba mazangi na eteni oyo ya bande—Mok.]

Nandimi!

Ba-ntembe na ngai nyonso ekundami kati na Liziba.

211 Bondimi yango? [Losambo balobi: “Amen.”—Mok.] Amen. Oh, Azali malamú mingi, boye te? [“Amen.”] Bamosusu na bango bazalaki na ba-mbeto wana ná ba-mbeto ya babéli, batelemi mpenza mpe batamboli; batiki yango elali wana, mpe bakei na bango. Oh, moto nyonso akoki kobika sikawa, oyo akondima yango. Bondimi? [“Amen.”]

212 Pesa biso loyembo oyo, *Nalingi Ye*, okolinga, ndeko mwasi; loyembo ya kala oyo, “Nalingi Ye, nalingi Ye mpo...”? Tótombola mingongo na biso, mpe maboko na biso, mitema na biso, epai na Nzambe, mpe tóyemba, “Nalingi Ye, Nalingi Ye, mpo Alingaki ngai liboso.” Bisó nyonso sikawa.

Nalingi Ye, nalingi Ye
 Mpo Alingaki ngai liboso
 Mpe Asombaki lobiko na ngai
 Likolo na Eku- . . .

213 Mwasi moko, atele mi longwa na kiti ya kopusa, azali kotambola awa na lialisi ya mibali mibale. “Ngai. . .” Tópepa maboko na biso epai na Nzambe, “Nalingi Ye!”

Nalingi Ye
 Mpo Alingaki ngai liboso
 Mpe Asombaki lobiko na ngai
 Likolo . . . ya Kalvari

Tókumisa Ye sikawa, biso nyonso!


214 Nkembo na Nzambe! Totondi Yo mingi, Nkolo Yesu, mpo na bolamu na Yo, Bozali na Yo. Oh, totóndi Yo mpo na Elembo, Nkolo. Tobikisami mpe totondisami na Molimo, Molimo Mosanto azali kosopana na nzoto na biso sikawa. Ndenge totóndi Yo mingi mpo na yango, Tata! Oh, na Nkombo na Yesu, totóndi Yo. Amen. Amen.

215 Bópesana mbote na maboko, bóloba: “Lokumu na Nkolo!” bópesana mbote na loboko moto na moninga na ye, bóloba: “Lokumu na Nkolo! Nkembo na Nkolo!” (. . .? . . .) Malamu, sikawa, biso nyonso elongo lisusu:

Nalingi Ye,
 Maboko likolo, mitema likolo.
 Na . . .

Bótalisa yango mpenza longwa na motema na bino.

Mpo Alingaki ngai liboso (Okolinga kosilisa?)
 Mpe Asombaki lobiko na ngai
 Likolo na nzete ya Kalvari.

216 Sikoyo tógumba mitó na biso na limemia mpenza, lokola nazali kozongisa sikawa losambo na maboko ya ndeko Grant mpo na kosukisa; natondi moko na moko na bino. Ya liboso, nazali kotóndo Nkolo mpo na boboto na Ye, mawa na Ye, mpe kondimisama oyo totiki na mitema na bino, ete tozali awa biso moko te. Mokonzi monene ya Mapinga na biso azali katikati na biso. Lokito ya kogánga ya Mokonzi ezali na kati ya molako. Mpe totondi Nkolo, mpo na komona nguya monene na Ye mpe mawa na Ye. Mpe sikoyo tógumba mitó na limemia. Ndeko Grant. 

ELEMBO LIN64-0308
(The Token)

Liteya ya Ndeko William Marrion Branham oyo, eteyamaki liboso na Anglais Mokolo na Lomingo sima ya nzanga, mokolo ya 8 Sanza ya Misato, 1964, na Soul's Harbor Temple na Dallas, Texas, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org